




河北省立
天津特別市
市立第二圖書館

10383



天津特別市市立第二圖書館 29-6.1.0000

陝川詩鈔
二十

卷之二十一

平湖徐惟琨署檢

從緒十八卷
版藏雙山講舍



昔之賢哲抱其聰明才知與其所以不傳者往矣而吾猶欲
提挈短長權度倫品錙銖失得相與周旋于數千百年之間
一若親接其音聲色笑亦賴有著作之存焉爾學者不于此
乎問途而求自哉然而且其且者或遺其精搜其近者或忽
其遠兼其要其漏其譏譬諸采玉于淵罔知夜光魚目之
辨求材于石亦僅托栴栴培之擇其重取盈卷軸又烏能見
重于世乎曹君編石所輯硤川詩鈔而歎其罔羅之苦心
深有合于備幽發潛之道者硤川于海昌地處一隅而擅通
邑之勝凡鉛峯縹壑靈石甘身巖日仙真遺跡有若葛稚川
求丹之井馬自然元樓之室顧華陽讀書之臺與夫星樓月
榭紺塔紅亭浮屠老子之宮室遠時近遠參差掩映于青林

硤川詩鈔 卷首

碧樹閒望之若繪是以生長其地多魁儒秀傑而一二畸人
逸士騷客寓公亦往往潛踪寄跡託意歌詠以適其志古今
來不知凡幾是編取其信而可徵者斷始有明迄乎

昭代分前集正集外集通得古近體詩二千餘首末附詩餘
蒐采可云極備且每人各係里居出處次以諸家評語詩話
俾覽者開卷而得其生平尤合知人論世之法昔南疑沈子
纂樵李詩繫盛爲竹垞檢討所推許其言曰七子八家推崇
軒冕而忽意山林毋乃與風人之旨適相刺謬南疑汲汲乎
表微闡幽其閒忠節孝義之事森然羅列雖曰一郡詩林是
又千秋文獻資也桐石之爲是編與南疑竹垞之志夫豈有
二故予竊謂硤川雖一隅詩林而海昌千秋文獻之資亦于

是乎在世有博識未審能心契于斯言否
嘉慶甲子歲重陽前三日兔牀吳騫序

破川詩鈔

卷首

二

錄鄉邦之詩者若宋王伯厚四明文獻集元房祺河汾諸老詩集汪澤民宛陵羣英集自明以來就吾浙而論若朱翰樵李英華翟校練音集邱吉吳興絕唱集宋士四明雅集張時徹四明風雅黃太冲姚江逸詩阮元聲金華詩粹許鳴遠天台詩選趙諫東甌詩集等殆不可勝數蓋猶是國風遺意也硤石爲海寧鉅鎮實浙西勝地山水清嘉人文炳蔚有宋沈宣撫之大節元縈祭酒之名儒豈無吟咏篇什乃缺焉不聞良由無好事者早爲囹羅放失刊諸梨棗以廣其傳耳余近寓斯土獲見曹君桐石所輯硤川詩鈔而欣賞焉其采取甚博其體例甚嚴又得及門顧君葛民勤于旁搜佐其收合舉凡已刻未刻諸集暨家乘之記載寺觀之留題無不訪求桐

硤川詩鈔 卷首

二

石爲之選擇焉闡揚焉故多出於著述家所未見者又人各作小傳閒取先哲題評言簡而該文約而富綴其所著紫硤文獻錄大都發潛德之幽光昭倫常之根本詩也而關於史是誠善說詩者乎每慨世人鄉曲之見集錄詩篇必傳會往古名作則失之誣或泛列目前交游則失之濫惟茲斷自明代所以存真不收同時所以示慎事增文省不支不漏而題詠古蹟并相與來往名流因以借見一如纂修史志秉筆直書大公至正絕無勢利之念存于中洵堪與四明文獻集諸書並傳矣詩曰維桑與梓必恭敬止硤川多才讀是鈔者庶幾聞鄉先生之風而興起也歟

嘉慶十七年二月三日郭海陳鱣撰

古之論詩者莫精於嚴滄浪然主之以別裁別趣以爲非關理學則大不然詩以言性情也言性不本於理學則頑劣之性而已言情不本於理學則村俗之情而已至比之鏡花水月無跡可求是將率天下之詩人相與蔑理廢學歸於虛無寂滅之教絕無與於溫柔敦厚之旨其流弊可勝言哉夫詩之所貴乎理者非必如有宋諸儒之專務格致也陶靖節會意便忘食其妙悟之所及未始不從疑義相與晰中來也所貴乎學者非必如齊梁諸子之敷陳綺麗也杜少陵每飯不忘君其忠義之所發未始不從讀書破萬卷中來也本於理而不失之腐本於學而不失之縛詩之大法備矣海昌曹君桐石以鄉貢進士舉孝廉方正累徵不就士論高之余蒞任

硤川詩鈔 卷首

四

海防聞其名重其品以未得一見爲憾昨其徒顧生葛民攜桐石所著東山樓詩集及所選硤川詩鈔請序於余余觀其所著詩油然粹然有理與學之源無腐與縛之迹所選硤川詩自軒冕山林以及閭門方外兼收並採類多抒寫性情和平中正之作又爲考證舊聞各立小傳發潛闡幽傳文獻而資觀感此其究心於理與學者爲何如又豈同鏡花水月之雖有如無有哉余於詩學未敢自信然猶能言其理今觀桐石所著詩與所選詩益信詩法之必本於理與學者非余一己之私見也因爲辨論及此合而序焉他日得見桐石還當面質之

道光壬午小春陽湖呂榮書於東海防官署

在昔吳芑君前輩有硤川詩略之選余嘗求其彙則僅存前
集十餘紙後又見其手輯人物志略一冊凡詩話皆附載亦
惟二十餘家蓋雖選而未成書爾夫古人竭一生學力形諸
歌詠生旣無顯榮沒卽隨以零落良可慨已表其微而闡其
幽不誠恃乎後人哉余少時竊有志焉而耳目未周隨見隨
錄藏諸篋笥庚申春王松岑表叔有硤山志之輯遍徵文獻
余亦相與蒐羅而遺編逸彙稔碎錦殘縑裒然盈案譬若良材
異石一經抉剔而勝槩畢出也爰命兒子彙爲一帙共二百
餘家得詩二千有奇較諸芑君所收不啻倍蓰矣每當風瀟
雨晦几淨窗明之際一爲展誦恍與先哲相晤對卽山川風
土軼事舊聞亦藉以考見一二何快如之不可見潛德幽光
固自不朽而顯晦之間又存乎其時也與編旣成爰書諸簡
端以藏之時

嘉慶甲子仲春曹宗載識

破川詩鈔凡例

一破川文獻宋元以上無可徵收茲編斷自明始以前明諸公詩列爲前集

國朝諸公詩列爲正集

一流寓諸賢理宜附錄爰合兩代寓賢詩確有可據者輯爲外集卽閨秀吟詠縉羽唱酬以及乩仙之作俱就見聞所及悉爲附入

一時次爵秩例應分晰註明今於人名下各系小傳或綴以詩話及諸家評語亦知人論世之一助

一詩餘亦名家所不廢茲就各本集所附見者輯爲詞鈔一卷附錄于後

破川詩鈔 卷首

六

一諸賢遺集悉從友人處借鈔或因他書所載錄入耳目未周罅漏殊多卽所經見者亦限於卷帙美不勝收惟冀同心不吝惠示俾得續選實所厚幸爾

硤川詩鈔目錄

卷一 前集一

陸子孟

宋鎮

孫子良

潘毅

宋徽

沈榮

孫暉

周敬

聞人樸

聞人璇

聞人師孟

沈龍

○沈祐

宋懋

聞人嘉言

朱有孚

○沈友儒

唐俞

王恩

沈卿

○吳遵

湯煥

朱象衡

周啟祥

吳道

吳默存

宋瑛

胡廉伯

○曹嘉謨

卷二 前集二

硤川詩鈔 卷首

七

聞人龍

○曹履泰

談子庭

趙昌齡

陳巽

蔣遵道

崔培元

陳元鼎

陸鈺

吳述

陳用

沈一鳴

沈元超

沈復祖

沈藩

沈端

李輔

周斑

王化翔

沈抗

邵鼎

顧松

○周宗彝

○周啓琦

范景尹

聞人倬

蔣珩如

田徽

卷三 前集三

鄭雪昉

吳誰脩

姜思

周明依

○談遷


張嘉炳

○曹元方

姜日儁

卷四 前集四

維



○陸嘉淑 ○潘廷璋 ○陸宏定

○周文煊 郭宗儀 朱濬 沈亮采

沈兆曾 李憲勉 郭賓 陳之美

楊廷棟 聞人楨 鄭許捷 張煥

虞文彪 顧懷純 翁嵩 顧和令

○張英 沈周仕 沈光世 沈周世

陳使新 殷飛溟

卷六 正集二

○許汝霖 田士章 王化成 顧開宗

查燦 閩人楫 張韜 周易

硤川詩鈔 卷首

八

沈翼世 陳雲驤 陳雲駿 陸械

沈名世 張宏保

卷七 正集三

曹三德 高人鑒 徐蘭嘉 吳紹隆

○張曾祺 楊璋 郭之偉 夏錫陞

查洪 周敬 王廷獻 陳師捷

潘昭鑑 張宏士 唐天寅 顧天楫

陸楨 陸枋 沈明德 周文燿

周文燿

卷八 正集四

○沈翼機 沈廣焯 ○許惟模 周文煊

聞人蔚

徐南珍

陳謨

沈濂

聞人文燧

沈如綸

沈菁

胡銘

聞人佩

卷九 正集五

○張珍

曹三才

郭兆駿

王廷珍

高濠

顧周

沈甯遠

蔣作楫

胡嵩

吳作楫

王廷昌

陳廷棟

李時夏

陳學沆

褚祚

張時中

楊雲章

葉上林

陳典謨

卷十 正集六

周湘

曹璣

胡倫

周奕

硤川詩鈔

卷首

九

朱思誠

○許惟枚

○陸鶴

楊英

○李肇開

陸鴻

徐文炳

陳鳳藻

陳鳳彰

宋楚珍

錢國楨

張蘭

卷十一 正集七

錢匡

郭廣琛

周孺

○許焯

周中培

陳時夏

王仁錫

郭懋嶸

卷十二 正集八

程鉉

潘綱曾

潘光綸

潘方稷

顧乾

張進鼇

張之徵

吳鼎

沈郭煜

沈廷薦

姜學夔

唐曾銘

沈維基

陳齊敬

徐願學

吳育行

劉尙德

張邦相

顧嗣愷

卷十三 正集九

○陳遇堯

許承祖

許士杰

沈淵進

莊允昭

程南圖

○張朝晉

卷十四 正集十

李鳳綸

吳嗣廣

王中驥

吳勳

祝宏猷

董宏祖

蔣宏任

周思

李晉

李潮

張行任

蔣印元

高天祐

張模

吳元萊

高華

倪學深

李炯

孟浩

王朝俊

曹虞

硤川詩鈔 卷首

卷十五 正集十一

沈雅臺

陳涵

王瀚

陸鳳飛

卷十六 正集十二

○陸攀堯

吳岡

沈明俊

吳世勳

倪炎

劉涪

胡亨

張鳳綸

陳逢堯

沈元錕

沈元錡

吳山來

謝慎餘

謝曦上

王德浩

倪玉田

李榕

高翼

吳志雲

卷十七 外集一

○貝瓊

胡奎

○蘇平

張甯

○董灃

朱樸

陳鑑

孫一元

○吳太沖 錢敬忠 ○郭澹 周九巽

張道濬 劉復 李明嶽 陸鉅

王翊 蔣之勣 王庭 錢肅樂

錢光繡 查繼佐 陸圻 張次仲

○朱朝瑛 張鷟

卷十八 外集二

●朱一是 姚佳 范驤 陳確

許箕 胡山 徐于 朱願為

卷十九 外集三

○蔣薰 周質 葛松 徐元粲

○朱嘉徵 朱昇 陳詩 陳勳

硤川詩鈔 卷首

楊中訥 查慎行 朱爾邁 朱涓

吳啟熊 查詩繼 嚴岳 查昇

徐掄元 陳世基 陳梓 徐昌

祝華鼎 汪仲鈞 王又曾 葛璇

沈開勳 周嘉穀 陳璘 張上發

蔡人麟

卷二十 外集四

高涼 高沈氏 徐瑩 吳青霞

朱宜人 查孟 許玉芬 梅清

陳絢 張步萱 薛英 沈蕙

大皞 林璧 宏道 曷庵

靈禮

明熙

通門

行文

洪達

勿虛

昭上人

岳宗

湛聞

音澄

日省

孔彰

純一

張湄以下道士

周御

緣英仙子以下

仙

陽明山人

散花使者

月府侍書

陳預塘

呂純陽

破川詩鈔之輯于今垂九十年矣蔣夢華先生楷

曾欲刊之而未果易簣時深以為恨是冊于兵燹

後得之亾友郭君子方彬聞徐芳樹孝廉聯輝亦

藏有一本為人借閱失去微郭君則曹徵君搜訂

之苦心不幾蕩為煙雲哉亟付手民以廣其傳其

破川詩鈔 卷首

十一

資則出於雙山講舍云光緒十八年九月許仁杰

識於當湖學舍

硤川詩鈔卷一

里人曹宗載桐石手輯

受業顧瀾葛民參校

陸子孟字養浩號求吾又號介庵洪武乙丑進士

陸氏家乘云由

貢生應會試外志作甲子舉人恐悞官至刑部侍郎

紫硤文獻錄考陸氏家乘先生為辛齋叟從祖少居硤元未遭亂避地鎮西今陸家亭其故址也嘗游方正學之門官秋曹時冰心鐵面風節凜然邑志僅列選舉不為列傳殊為闕事稟久散佚茲從友人處借得辛齋手錄雜詩一冊尙存三首

吉光片羽彌足珍愛

暮春

垂楊垂帶卷重樓
罩戶濃陰綠漸稠
自訝芳辰銷藥石
不禁花事老汀洲
閉門風雨經時臥
故國烽煙萬里愁
莫到最高

硤川詩鈔 卷一

原上望江南春已不堪留

雨牕

夢裏鄉關客裏身
厭聞檐溜滴經旬
鶯花已是難除悶
風雨何須更妒春
大有商量營壘燕
絕無聊賴倚樓人
不情天氣初長日
獨自支頤岸角巾

白蓮

誰將冰雪淨炎暉
虛白相生靜與依
可是鉢中傳化象
還從華頂得清機
水邊影漾神彌淡
月下香來氣自微
每望素姿難寫取
晶盃玉盃覺全非

宋鎮字仲方洪武丁丑以薦入欽天監授博士遷挈壺正

春暮積雨

重陰時幕屋亂點日敲扉煙潤添茶嫩花清借雨肥晚峯雲
作被敲石蘚爲衣寒欲留春住遲歸計未非

孫子良字素菴永樂癸未舉人甲申進士選庶常預修永

樂大典遷兵部武選司郎中後謫交趾吏目尋拜交趾

參議晉山東右參政著有螺城集

到天涯驛渡海

已到天涯驛那堪路更賒瘴雲迷遠島潮水浸平沙蜀道誰
云險秦山未足誇所希天道祐不異泛仙槎

至日作

天南逢至日暗想轉悽然去國一萬里辭家十五年羈危常
自保衰謝有誰憐卻羨階前草年年得氣先

破川詩鈔

卷一

登海上葆真觀玉皇閣

玉皇高閣倚天開此日登臨逼上台一派潮音天樂下半空
雲氣翠華來窗涵海日神光動地接仙壇鶴影回倚遍危欄
未歸去恍疑身已到蓬萊

寄海上葆真觀沈道會

環珮珊珊禮石壇步虛何必上茅山門臨滄海月先到樓入
青霄鶴易還俗遠已無塵事累丹成不遣鬢毛斑幾時乞得
歸林下來聽仙歌杳靄閒

交州聞角

疎窗月落夢回時何處金笳帶月吹卻記單于城上聽不知
身世在南夷

江路見落花有作

濛濛煙雨濕江花江上行人正憶家不省故園兒女輩看花
曾否憶天涯

潘毅字夢軒正統丁巳歲貢生官岳州府經歷

紫硤文獻錄唐聖言先生有喜潘岳州歸田詩云瘴霧
蠻煙萬里餘得歸東海舊茆廬山中淨業依然在身外
浮雲總是虛得句漫題西斡竹養生堪著北窗書從今
好約登山伴兩硤峯頭一振裾夢軒先生事蹟無徵讀
此詩猶可想
見其梗概

詠懷

青霞覆郊館翠鳥雜鳴騶幽居易爲適細帙自綢繆門前多
岐路來往何所求所求有得失淹忽春與秋積光不再圓壯
志抱沈憂芙蓉媚洲激猗蘭秀丹邱或貞而或脆所志各不

硤川詩鈔 卷一

二二

侔冉冉成終古榮落幾時休

桃李當春榮蓉桂耀秋霽芍藥以麗雄梅花以瘦慧稟命各
有定智力亦空做達者安自然閭者妄心計心計奚以爲得
喪擾終歲不如懷天游鷗鷺結幽契晴雲豁塵襟碧流明衣
袂共醉瓦盆酒不嫌藜藿糲長揖謝持籌空谷多薜荔

宋徽字宗和鎮子正統間授欽天監保章正

硤川志宗和纂捷法數書占奏奇中屢獲優賞後辭職
歸里賜第承恩堂子孫世襲欽天監博士其在硤者世
爲陰
陽家

丹井樓有懷

半生簪笏近螭頭此日歸來續勝游嗜酒未尋陶令社題詩
先上遠公樓山銜日影江城晚樹挾風聲海國秋身在故鄉

心在關五雲飛處望神州

沈榮字希仁正統甲子舉人桐鄉籍官至韶州府知府

紫硤文獻錄先生家觀谷村在硤西數里擢中憲時乘傳故里知交祖道咸贈以詩名五馬經鄉集亦一時佳話也

倦游示同志

倦游欲唱望江南世事從渠百不諳
盍亦歸哉秋似許無能爲已老
何堪貧來待乞伊蒲饌
隱去還同彌勒龕
莫笑平生難作爾
原知巧思遜吳蠶

孫障字景章子良子景泰壬申薦舉賢良方正授泰和丞

遷博白令從征藤硤有功陞潯州太守晉山東右參政

紫硤文獻錄公十歲登泰山王方伯命詩立就云門前駐紫駟我欲趁春游岱岳峯頭去披雲眺九州官泰和硤川詩鈔卷一

四

時奉職循理不徇豪右民苦徭役公頃刻裁定請託不及人稱爲霹靂手日其榜曰鐵榜言至當不易也

送閩人聖謨歸硤川

昨夜西風起潞河祖筵離思欲如何
青山兩岸歸程遠紅蓼半江秋色多
雁塞已聞經國用龍池今喜沐恩波
到家樂事應無限綵服烏紗隱薜蘿

周敬字尚禮號澹齋景泰壬申以賢良方正薦不就著澹

齋迂叟稟

紫硤文獻錄淡齋先生學行醇謹志尚高潔嗜吟咏以性靈爲宗嘗輯唐詩選脈其曾孫珽續成之梓以行世

紅梅

璀璨林閒自絕塵絳紗牕外數枝新
燕支塗抹容逾好粉墨描摹樣不真
曲譜豔歌飄綺席春扶醉態泥詩人
紅羅亭畔

多承寵茆屋何堪著此身

聞人樸成化丙戌歲貢

見梅

踏雪尋芳少雜思此行端爲探幽姿嬾拈翠筍成三弄忽過
危橋見一枝馥馥暗香來斷岸離離疎影映流澌何須重到
羅浮境已是師雄入夢時

聞人璇字時中成化甲午舉人官永安縣知縣

紫硤文獻錄先生任永安政績無可考有王傳方送聞
人大尹歸硤一絕云公來何處不歌謳公去何人不淚
流除卻圖書并琴劍更無一物
載歸舟此詩雖淺亦略見一斑

題湖山小隱贈周淡齋

數椽白屋寄人閒滿日繁華迴不關滌硯有時臨碧沼捲簾

硤川詩鈔

卷一

五

長日對青山風來竹外芹香細月到梅邊鶴夢閒元酒太羹
滋味別此中高興許誰攀

聞人師孟字養浩宏治甲子舉人

邨居

桐綿落盡見桐花好鳥嘯時日影斜草帶新泥過白鹿溪當
積雨漲紅霞繰絲唧唧籬間出荷鍤鳴鳴野外譁共說天工
憐間開桔槔無復借鄰家

沈龍字湘南正德丁卯例監任雲南提舉司提舉明制有
楷書例

二十歲例四十歲例四十五歲例蓋生員應例作
監生非納粟納銀之謂捐始于嘉靖前此未有

有客

侵晨有客來江左徹夜無眠話浙西眼見兒童皆受室手栽

桃李漸成蹊老親堂北倚閭望稚子門東索飯嘔聽罷黯然
傷老大悔教留舌示山妻

沈祐字天用號紫硤正德閒貢生任周王府典膳郎著有

涪樸園橐

吳本泰云先生之詩清冷淡遠儻然塵外而
韻鬱激楚之氣隱見其中○談遷云天用聲

律嚴整而潔閒用少陵
法而大旨出白太傅

紫硤文獻錄山人絕意仕進築涪樸園于紫微山麓藥
欄花塢頗具幽勝一時名流如朱西邨陳勾溪董蘿石

關中孫太初輩詩酒相娛徜徉其
閒非騷人墨客罕得窺其園者

小景爲半江題

結茆青山巔煮茗白雲裏童子抱甕歸幽人睡初起浮煙滿
戶庭月照半江水

社飲

硤川詩鈔

卷一

六

山人偶出山一笑將何適手把古梅枝來訪海濱客海濱有
幽期邀我同讌集愛此座上賓欽欽示容德時當芳歲徂庭
宇殊蕭瑟醇酒正宜人良會不可失爲懼復幾何長江送殘
日

倚杖問月

明月出滄海明見天地心體魄絕渣滓光華流古今我來倚
杖看不足皎皎團團如玉綠煙飛盡黑雲收桂殿分明在
吾目問渠何事缺復圓妖墓磔飛從何年伊尹搗藥今在否
嫦娥守節誰相憐叨叨問明明月不應我竚立空山中孤
懷實悽楚安得海波作酒花當籌喚起太白同遨遊浩歌采
石江中央爛醉峩巖亭上頭金尊吸月月入腹清氣釀成三

萬斛平生磊砢一掃除吐出新詩駭流俗

秋日同孫太初董子言陳用明僧雪江散步湖上以老
杜山青花欲然分韻得然字

斜日南屏路幽尋短褐便忘言流水上得意野鷗前世隔漁
樵地秋高鸛鶴天遲留不知晚疏樹一燈然

夜坐

病起意更好科頭看水流江寒詩骨瘦客散野亭幽孤月作
清夜一杯酬素秋海鷗來去熟元不避虛舟

水閣新涼夜山中一葉秋荆扉和月動天影入江流野爨連
漁火星河帶客舟帝鄉雲霧隔憂思滿滄洲

夏日園居

硤川詩鈔

卷一

七

睡起無餘事科頭玩物華日斜蜂課蜜雨霽樹添花筍迸階
前土江吞檻外沙小童解生理桑下學鋤瓜

新春紀興

小閣春風動孤梅靜自妍只緣人懶散轉覺地幽偏手自移
花種兒能辦酒錢門前屢市路不踏已三年

東溪

東溪原混混坐對欲忘言秋影雲常溼寒光夜不昏樹深山
帶暝天淨月留痕得句鷗羣下呼童洗玉尊

吳東澗過

有客問蒿萊蓬門試一開臘隨殘雪盡春共故人來世外鳥
藤杖梅邊濁酒杯相逢須痛飲容易鬢毛摧

黃勉之明水草堂和王濟之閣老鑿韻

湖上覓柴門
菱花水鏡分
舟橫孤嶼月
人臥一堂雲
漁父元知道
庖羲不事文
闌干俯虛碧
長嘯起鷗羣

碧泉

一脈通源化泠泠
近竹聲碧連瑤草
淨紅泛落花輕洗
藥搖天影煎茶帶
月明仙家知不遠
何處問蓬瀛

竹雲

一邱團野色十里隔紅塵
山暝長疑雨林深不見人
氣蒸書卷潤影動月華新
聞道王猷在休嫌杖履頻

寄休寧孫朝用

滄洲抱病憐孫楚
白屋悲歌臥隱侯
歲月尋詩花照眼
乾坤

硤川詩鈔

卷一

八

多事雪蒙頭
山空紫破孤猿夜
葉落清江一雁秋
何日開尊重下榻
石牀風雨話窮愁

孟春廿日山行東園攜酒至分韻得生字

春山雨過石池平
萬壑朝來爽氣橫
紅紫淨時塵後夢
玉驄醉覺野人行
空林蝶散孤筇入
敗圃花遺獨樹明
阮籍途窮天地老
尊前一笑豈平生

胡中夫過訪

勾溪每說夢溪子
數載神交此日逢
一笑黃花時已暮
相看意氣道還同
寒崖樹色留殘照
深谷茶煙度晚風
紫芋青蔬終不惡
放歌莫惜酒尊空

次韻酬孫樸居侍御

宿靄殘煙望裏消
每瞻山斗憶人豪
五湖天闊雁鴻斷
十月寒深風露高
小甕撥雲招酒伴
長竿抱月臥江舸
懸知己信蓑衣
好笑脫藤蘿
挂錦袍

後溪

薪水初平舊釣磯
前山唳鳥落花飛
鷗來似與人添伴
地僻寧慚客過稀
已許漁竿酌野性
敢忘物色到蓑衣
得魚沽酒歸來晚
星月滿天搖竹扉

題陳希夷圖

舉世醒猶睡
先生睡亦醒
浮雲自來去
不礙華山青

後齋小酌

尋芳偶過野人家
到手深杯日未斜
一笑乾坤春事了
杜鵑

硤川詩鈔 卷一

九

唳雨落山花

漫興

與世無關道自尊
山中別有一乾坤
羲經讀罷茶煙起
庭草春風綠到門

睡起

閒開青草客來稀
春色年年燕子飛
自愛山中濃睡好
松風涼滿薜蘿衣

汪石溪海天一葦卷

狎鷺盟鷗脫世緣
五湖風物米家船
青山倒影月在水
長笛一聲秋滿天

幽居

一枕黑甜盤古夢半簾晴日落花風凭闌意到了無語白鳥
飛來江影空

贈醫士郤廷惠

懸壺市上活人忙曾得龍傳海藏方鶴背歸來天欲曙一聲
鐵篋月蒼蒼

臨終詩

小寄人閒五十年黃花籬落白鷗邊于今厭世還歸去水自
東流月自圓

宋懋字文勉椒子任南京欽天監博士陞五官挈壺正

登紫微山樓有感

積雨俄驚聞鷓鴣一泓新水漲平坡半生白髮愁中得兩硤

硤川詩鈔

卷一

十

春光夢裏過滿地落花人跡斷隔溪深樹鳥聲多攤書穩坐
青氊久不覺閑階長綠莎

聞人嘉言字聖謨號北山嘉靖壬午舉人官至亳州知州

紫硤文獻錄正嘉間沈紫硤築酒樓園于西山麓先生
解組歸亦構雲莊于東山石魚涇背山臨水時號小輞
川好事者爲繪北山雲莊圖一時並盛乃清樸園稟
經後人重梓至今猶存而先生全集不可得見矣

天開圖畫樓次貝清江韻

鬼斧何年劈此山紫微深處隱禪關煙霞有路通天
上雞犬無聲隔世閒突兀峯巒橫碧落參差樓閣現朱
殷茫茫塵市樊籠小策杖西風一解顏

同邵白石周硤樵登審山

攜手尋樵徑煙霞結社新風巖紅葉冷石甕綠醅春舊事慙

騎竹清歌效采蘋日斜人影亂歸路岸烏巾

朱有孚字子貞號薇山嘉靖甲午舉人甲辰進士官廣西

道監察御史終嶽州府知府

紫破文獻錄侍御宦績無所考守薇時沈紫破嘗寄以詩云馳馬行春勢若風豺狼無地可潛踪憂民早致三

瑩白報國終存一寸紅經世文章推仲晦中興禮樂待

周公鄰封共戴光天下舞破蓑衣滄海東風裁尙堪想

春歌觀觀音繪史又武起

涼風吹勁草爽氣集秋林澹蕩空江意蕭疏太古心浮雲常似客落葉苦催吟閉戶談莊易如聞王郭音

揚州府同知有南泉集

陟川詩鈔 卷一

十一

紫破文獻錄陟川諸寺觀碑記出先生手筆者十居八九著述之富信有徵矣志稱先生博極羣書手不釋卷性放誕淡于宦情惟事游覽與詩酒爲緣非虛語也全集久佚僅從志乘中錄得數首殊堪歎惋

題東嶽廟

縹緲煙霞接上台躋攀東望壯懷開三韓遠使虛秦望封禪遺文陋漢才夜半暘烏飛日觀層霄仙羽下瑤臺長生殿上春如海賸有餘波及九垓

周宣靈王殿落成

岩巖輪奐做新宮祖殿橫山一徑通曉馭陰風嘶鐵騎晝騰雪浪鼓艨艟簪纓已晉王侯座脣蠻應非土木同襁褓蒼生多皓齒寰區誰不仰仁功

三元閣

重岡金碧倚崔嵬，千古三元奉羽衣。
書靜玉笙聞下界，夜深寶笈帶星輝。
岫雲聽法依空谷，野鶴傳經下翠微。
曾會羣真朝絳節，應將圖籙啟宸扉。

唐俞字聖言號丹泉著審山樵吟草

紫硤文獻錄處士博洽工詩嘗師事紫硤山人業益精進襟懷高遠淵源有自也兼工山水眞草大書流傳亦少

登智標塔

古塔盤空上天風吹鬢寒，山河開世界日月到闌干。
氣欲凌霄漢，身疑生羽翰。雲深徒極目，何處是長安。

春日登硤山次徐鶴山韻

兩硤春晴花正明，香風冉冉坐中生。
微茫不盡天邊樹，蒼翠

硤川詩鈔 卷一

十一

遙分海上城，杯泛落紅頻。送酒柳垂新，綠暗聞鶯東。
吳仙客多詞賦，埽石留詩更隱名。

九日登東山

錦樹青山宿雨收，百年高會兩峯秋。
三邊風急雁初度，萬里江空水自流。
巖壑已忘霄漢志，雲山不盡古今愁。
酒酣日暮西風起，爭把黃花插滿頭。

哭沈天用先生

紫微山下草青青，白鳥江空冷舊盟。
流水落花愁送雨，曲闌深竹懶聞鶯。
杖藜無復山中事，詩卷長留海內名。
日暮山陽數聲笛，渚風巖月不勝情。

淳樸園卽景

秋水漫長隄芙蓉相映發上有采芳人沿溪弄明月

芙蓉溪

江流雲影去鳥帶夕陽歸笑拂松根坐天風吹布衣

松風嶺

重過涪樓園感懷

涵虛閣上雨聲寒澗草林花不忍看惆悵青山思往事幾宵

風月共闌干

涵虛閣

藕花吹落碧池灣樹色蒼蒼兩岸山明月自來人不見白鷗

盟冷釣磯閒

藕花灣○灣之沙日白鷗沙沙上有釣石

楊柳青青水半灘角巾無復弄潺湲亭亭野鶴如相待白石

岡頭照影寒

柳塘○塘有渡鶴缸

通樵徑絕鹿麋羣杞菊闌憑幾夕曛展齒猶餘舊行跡山童

那忍埽寒雲

通樵徑○徑有杞菊闌

破川詩鈔卷一

十三

王恩字子恩嘉靖甲辰歲貢生官兩淮鹽運副使

淮署清明

春色真無賴鶯嘯百五辰邨邨插柳節歲歲別家人醴酪流

匙滑錫簫入耳新花飛長引恨不是惜芳塵

昔時游行處腸斷卅年前雨碧瓜瓢水風清卵色天衣香人

影渡歌扇酒旗船合眼追陳夢驕懷劇可憐

沈卿字邦宰號石涇諸生

沈氏家乘云公才富學深多著作今皆失傳此偶得諸東山道院

雙桐詩爲方明府

桐城有豪士小試來桐溪古來孤鳳皇合向雙桐栖政成明

日朝天去雙桐卽是甘棠樹

吳遵字公路號初泉嘉靖辛卯舉人丁未進士授長樂縣

知縣拜監察御史遷太僕寺少卿著九芝堂全集

紫破文獻錄初泉先生居官廉明勤敏惠民善政感深
耄稚炳載邑乘詩特其餘緒耳錄此數首亦足見前賢

風範

輓給諫許雲郁

金門早挂冠孤迥隔塵寰光岳千年氣東南萬仞山忽驚流
水逝應逐白雲還矯矯臨風屐斜陽紫翠閒

示白鹿洞諸生

廬山高出碧雲端精舍時開翠鬱盤百世流風瞻俎豆兩閒
元氣重衣冠巖頭草色春時遍樹裏嵐光晝亦寒薄暮吟歸
情未已尙餘幽夢繞清湍

硤川詩鈔

卷一

十四

匡廬南下石梁西古洞陰陰草樹齊春澗水深逢白鹿夜堂
雲氣護青藜聖非絕德心相似道在常行路不迷觸目鑿銘
皆實學更從何處覓階梯

湯煥字堯文號鄰初嘉靖乙卯舉人官翰林院待詔

紫破文獻錄先生工八法便殿平臺時膺召對宮花金
楮絡繹于道人以爲榮嘗嫁女無他裝惟贈以十箱皆
貯所手書曰寄語郎君乃翁遣嫁心力盡矣又嘗摹褚
河南千文二帖刻石其戚徐李二生各得其一徐氏一
石後歸竹垞李氏石聞在
海鹽不知落何人手矣

冬夜集徐叔明宅

倚棹新江上言尋孺子來人煙環海曲霞色近天台白雪梁
園賦清樽鄰下才劇欣殘臘後春意座中迴

朱象衡字朗初號漁亭諸生著春雨編

陝川志象衡爲侍御有字令子刻意風雅漢魏三唐吸
醕入奧駸駸作者之室一時詞人如歐植伯殷無美屠
長卿王百谷
皆相推許

崇福寺雙松

鬱蒼雙虬龍偃蓋青蓮宇昨夜風雨多溼雲飛不起

八仙臺

捫蘿拂紫苔解衣坐危石海上生夕陽秋雲亂峯逼

周啟祥字源伯號南鶴隆慶丁卯舉人戊辰進士官邢部

郎中遷廣州府知府陞江西兵備道副使

紫陝文獻錄南鶴先生出守廣州廉能明察大著循聲
具詳邑志居家惇孝友篤義行嘗置義田以贖貧族賑
鄰饑人咸頌之

歸就鄉試留別同硯諸子

陝川詩鈔 卷一

桂玉關心學業蕪筆花零落墨池枯恥開妝鏡勻殘黛苦爲
文衡索舊逋傲骨不隨人俯仰壯懷寧受鬼挪揄固知久聚
難爲別愁見秋風一幅蒲

吳道宇秋泉官周府典膳正

秋夜山寺聞歌

銀河懸午夜琳宇接三台何意秋風裏偏吹白雪來梵鍾飛
嶺度螢火逐星回幽賞殊難已尋聲上露臺

吳默存字乾峯隆慶丁卯貢生

湘中弦

洞庭秋水碧連天何處彈來月下弦不獨猿聲聽不得絲桐

淒斷楚江邊

宋瑛字白珩一字白筠著有漱玉集放言略

紫硤文獻錄先生詩硤志中惟存登智標塔一首近從陳茂才半圭敬璋處借得東海詩選四冊不知何人集錄皆明季海昌遺老逸稟讀之如游珠林玉府皆堪寶貴中有放言略一卷乃先生詩也首有陸鈿韋公序云白筠詩散佚多矣存者僅此耳可知先生著述甚富久經零落今幸不至如廣陵散遂絕人間亟錄如千首具見先正

獨不見

南風入庭樹池明水如練倚欄懷遠人
遠人獨不見忽見雙鴛鴦飛落藕絲片

訪秋潭上人

下馬寺門前尋與山僧遇秋色淡空林
隔雲孤磬度相對無一言從此愜幽素
古顏仍古心閒味淵明句坐久不知還寒

日下山樹

硤川詩鈔

卷一

十一

劍池篇

南山突兀石如齒中有一潭浸秋水故老猶傳磨劍石
劍痕耿耿英雄死芙蓉沈底千年青雪花飛盡泣山靈
水魅不敢過其渚悲風吹起漫山腥忽然虹怪嶽溲
次斗門沖入鬼母咽結成太白驅天狼桃花鮮深碧
于血空餘盈水何泓泓張華已去歐冶輕子獨臨流
長歎息何如掩作坵壠平

邊庭苦寒曲

黑帝作雲銀漢凍天吳欲僵不可動賀蘭山頭雪作
花鼓寒不起空高擲單于吹笳來牧馬千尺胡霜走
原野佳人未寄燈前裳指墮血染青梨鎗將軍寒暖
蒲桃紫朔風寂寂征夫

死

李夫人

漢宮寂寂愁雲飛，陰風慘慘吹羅幃。
孤燈熒熒照殘碧，夫人倏忽魂夜歸。
夢入鸞宮當戶立，蒼苔咽露銀箏澁。
荏苒龍巾抱舊香，六宮泣下紅水涇。
姍姍來遲搖玉璫，帝也望之心徬徨。
欲呼與語不可近，是耶非耶空斷腸。

登智標塔

攝衣最上碧雲連，目斷寒林鎖暮煙。
下界雨催山寺磬，亂帆風送海門船。
千頭古佛疏藤合，十里樵家獨鶴還。
笑指兩峯天外落，憑軒擬賦遠游篇。

早秋夜望

硤川詩鈔

卷一

十七

夜氣蕭森入簟涼，危樓獨自倚更長。
妖狐趁月學人拜，怪鳥嗥風斷客腸。
波漫平原沙盡白，笳高絕塞樹初黃。
憑闌忽動悲秋意，一曲離騷淚數行。

秋懷同蔣楚堦賦

十載蕭條一做裘，朝來風雨獨登樓。
雲高大麓千山曉，木落平原萬象秋。
天地至今猶帶甲，江湖何處可行舟。
不堪世事空長歎，呼酒頻消今日愁。

采蓮曲

采蓮復采蓮，夕陽半沈水浦口。
涼風多羅帶，忽吹起水濁蓮子肥。
水清蓮子瘦，子肥采宜先，子瘦采宜後。
阿妹初采蓮，不解葉上露，錯認鮫人珠。
偷眼幾回顧。

轉船過前浦搖曳沙棠楫貪看雙頭花采子誤采葉
蓮子采欲殘蓮歌唱不歇夜色催人歸棹破前溪月

寄楚擘

夜半悠悠動別思江天搖落寄書遲知君寂向平臺坐明月
青山處處詩

題畫

平原一望迴蒼蒼獨樹溪邊帶葉黃鳥外夕陽帆半落載將
秋色過寒塘

胡廉伯字敬所萬曆己卯舉人官巢縣知縣

次韻答教諭

咫尺東西解何愁促膝難三杯春酒共官舍一枝安情似巖

破川詩鈔卷一

梅淡心同絳蠟殘多勞貽白雪欲和悵中乾

曹嘉謨字廷述號心懷萬曆辛卯舉人官羅山縣知縣贈

太常寺少卿

紫破文獻錄先羅山公為人坦易治羅二年務以德化
不尚刑禁罷官歸事父懷椿公春酒承歡優游林下頗
具至樂嘗曰但願子若孫世為閔儒為廉吏即為孝子
通塞非所計也後侍郎公及銓部公以下世德相承庭
訓有素也種種義行具詳志中著
迹不多更經兵燹故僅有存者

古詩

我有一樽酒不知誰為賓故人御征車一去無迴輪掩關止
獨酌園蔬當佳珍一杯渴腸潤三杯槁顏春醉中發浩歌意
氣凌秋旻自獻還自酬形舒影亦伸晴朝連雨夕所遇皆懽
辰濁醪有至理斯言寧欺人安得營糟邱萬斛餉寒貧

秋孛輓

江南諺語秋孛輓石湖有句主損穀貧家望歲非尋常到此
安然慰所卜不先不後梧始飄數聲胡爲撼地軸誰云數聲
過耳速似聞千人萬人哭吁嗟乎天如憐憫千人萬人哭陰
陽失驗眞奇福

破川詩鈔

卷一

十九



破川詩鈔卷一

里人曹宗載桐石手輯

受業顧 瀾葛民參校

聞人龍字虞卿

登紫微山

紫微樓閣與雲齊石磴盤迴路不迷幽鳥忽鳴深樹裏好山
還在曲欄西歌聞水調滄洲近望入中原落照低老衲不關
塵世慮笑揮苔壁索詩題

曹履泰字大來號方城萬厯丙午舉人天啟乙丑進士官

福建同安縣知縣以靖海功擢吏科給事中後被誣論

戍嶺南應天廵撫祁彪佳特疏訟寃補行人司副復遷

硤川詩鈔 卷二

太常寺少卿終兵部右侍郎著有靖海紀略諫垣疏草

浪吟集

梁士濟云方城與余談天下事如高手弈棋着
着勝算至歌詠則託之浪吟而卷阿天保之忱

不忌于夢寐未始以淹留無成自況讀方城詩知方城

之經濟也○魏浣初云方城以孤踪亮節有聲諫垣三

幕被放絕無江潭顛顛之容詩則經心幽詣隨物巧

摹破冷然飄飄然有哀而不傷怨而不誹之微旨焉

紫破文獻錄先少司馬筮仕同安海寇鄭芝龍就撫餘

黨李魁奇鍾斌等以芝龍為名蹂躪中左等處同安又

無兵守公乃行軍甲法訓練漁兵數百為保禦諸賊相

戒勿敢犯上官以海事尚任公公乃陰構斌使叛魁奇

海死擢給諫疏糾吏部李某躡等銓選李銜恨勢大璫
王永祚誣公下獄論成粵東
浪吟集皆斯時紀行之作

牧牛

一人牧羣牛牛隨豕與鹿參差滿山阿擇草以飽腹既飽將

何之呼羣復飲瀆飢渴任所需牧子忘其牧飯牛而牛肥駕

輕如就熟此意可類推何況是我族寄語司牧人勿使民生
蹙敲撲與追呼人豈不如犢

舟中嚼白飯戲占

有肉肉送飯無肉飯送飯肉飯飯不甘飯飯肉反遜萬物各
含春雜之失其真無可下筋處那辨酸與辛葵餐與鼎養豈
復分等兩止供三寸舌一過皆成往勿謂相公祿山海終有
匱寄語食肉人鄙哉空碌碌

滌硯

呼童盛水以滌硯頃刻墨光浮水面那得魚兒將水吞濡頭
未能潑無絹煙雲撩繞撥不開龍尾星文點點見硯池洗出
本來身水則因之黑白變到底是墨水還水會歸河海仍白

硤川詩鈔

卷二

二

練是非世界乍晦明境有轉兮性不轉

南昌曉征

鐵柱鐘聲送落星梢人有語夢初醒西山曙色隨帆影南浦
歌喉帶露冷朝氣迎人逢客路曉雲拂硯發新硯轉思昨日
登臨勝南北翻飛一鳥翎

過梅嶺

誰將鬼斧奪天功石壁分開西與東空闊僅旋兩馬足稜層
欲壓萬山重盤虬古幹松鋪翠傅粉新枝竹鬪風幾樹老梅
依怪石清標端不待春叢

崔二水席中口占

異地相逢是舊歡何須絲竹侑冰盤將軍虎帳清歌永澤國

蛟宮逼膽寒猶憶昨年鼠腐嚇那知今日俎樽寬少年秉鉞
君家事詎必鷹揚盡釣磻

胥江晚景

晚泊胥江正納涼天威乍霽未能量長驅雨腳從風力裂破
雲心只電光一葉輓輻渾不定孤身傀儡逐他忙那知盛怒
移時盡瞥眼娥眉已倩妝

上灘下灘

乘流南下疾於彈欲進番摧送駕難千古升沈總此意不須
長歎路漫漫

題補夢句

十年前夢中得
末二句今補之

三月江灘氣尙寒黑風吹雨似藍關從來千古英雄淚不向

硤川詩鈔

卷二

三

無情暗裏彈

一日過弋陽貴溪安仁

孤帆一日過三城怒嘯風聲與水聲梭擲千峰忙客眼停舟
猶聽午雞鳴

僧房遇星士

逢僧一話百憂輕有客息息說五行得失寸心原自信靈甘
拋我問君平

夜泊

夜泊城隅送落暉千家燈火映柴扉危檣一望森如戟明日
東西何處飛

憶家

萬山山外是家鄉，獨對殘燈倍自傷。
插翅欲飛飛不得，夢隨明月渡錢塘。

宿西南鎮

柴扉燈火映疏櫺，客渡參差聚若萍。
新月一鉤橫水鏡，如何欲睡睡翻醒。

談于庭字存一

登破山

繞徑嵐深色漸開，杖藜先自惜莓苔。
馭風列子稱仙骨，鞭石秦皇果異才。
瑤島輕雲橫社燕，石泉新火試宮槐。
蒼茫紫翠吳天外，布襪芒鞋任往來。

趙昌齡字介眉號松崖諸生

破川詩鈔卷二

四

題三笑菴

石巖洗出最玲瓏，小築曾無半畝宮。
老竹色寒朝磬寂，野梅香淡午齋空。
前山客趁飛花雨，曲徑僧歸落葉風。
爲語遠公莫相送，鐘聲已過虎溪東。

百步石望東山雲起

倚杖山岡聽子規，白藤花落滿僧衣。
片雲忽斷東峰影，不覺將身入翠微。

陳巽字一和貢生桐鄉籍授京城左衛經歷以軍功遷後

軍都督府經歷轉北直隸薊州同知

紫硤文獻錄錄濱雲先生任左衛經歷值密藩之變與兵部尚書王瓊協謀靖靖亂寇平以軍功優敘上以闔外奇勳領并御裘賜之秩滿之日公卿祖道詩詞盈篋

山家

暫離城市入煙霞水淨沙明似若耶未捲白波浮竹葉且開
青眼對梅花話話深石上明殘照坐久林間集暮鴉歸去塵埃
仍撲面始知清況是山家

蔣遵道字太元萬厯己酉舉人

登紫微山望南湖

西山山頭南望湖白練環繞擁菰蒲野色霽色時互起山禽
水禽復亂呼輕帆得風故相引遠眺偕侶宜挈壺勝槩每與
勝情合徘徊窻間赤壁圖

崔培元字辰長海鹽籍萬厯乙卯舉人官青陽縣知縣有

橫山草堂集

硤川詩鈔卷二

五

竹窗解頤雜錄培元居硤鎮之東庭有二樹
左華則右寔右華則左寔土人謂之陰陽樹

長安

陳竇開隆祀昆明辨劫灰古來成帝里今日自樓臺國事紆
西顧天威儼北來綢繆關陝地豈獨武臣才

鶉野天文布龍山地軸雄翦桐開國事累葉後賢功車馬黃
塵裏關河紫塞中從來興王地文物兩京同

借竹軒

幽僻暑不到當窗野色分雨深苔過檻風定竹留雲澗水山
中味松聲靜夜聞孰教冷眼客書就北山文

陳元鼎字五和萬厯四十三年例監任鴻臚寺序班

嘉靖二十四年歲大歉提學副使孔建議民間子弟納粟
五十石卽註附學生起送納銀入監補助救荒御史

臺報可捐納
之例自此始

秋感

歸臥青山計未成無端襍被滯江城故衫欲浣逢秋雨鄉夢
初回恰晚晴遮莫征鴻添黯淡不須落木助淒清夜窗更有
歐陽感飽聽寒蟲四壁聲

陸鈺字爾式號真如萬厯戊午舉人殉節

按公後改名蓋誼號退菴

紫破文獻錄明神廟時孝廉得侵郡邑權關說民事退菴先生獨慨謝去杜門讀書手鈔筆評不下數千紙久困公車同年舉者類多貴顯公絕不干謁與張公元祐友善辨論經史談文藝中夜不倦庚辰辛巳間大旱蝗死者道相屬公首發家廩減價以糶邑中爭仿行之全活甚眾明心絕粒而死潘公廷璋沈公亮采吳公太冲皆有紀傳甚詳而邑志失載特記于此

築城謠

破川詩鈔 卷二

六

去年拆城城完好今年築城城摧倒將軍咆哮士卒怒大夫承冒恐不早城中之民鮮衣美食乘車輪城外之民易于鬻田手足皴城中之民張蓋舉扇蔭松筠城外之民渾汗流血白骨新皇天三伏何不仁知我興作烈日頻不死鞭笞死火雲根莠滿野無暇耘恨不少年早從軍高歌行扶吹索勤恨不投身胥吏羣罰鍰佐工追如焚近來聞得城夜號不悲城傾悲民逃民逃室空城徒高城傾民固城堅牢但願將軍整戰袍大夫飲醇醪不遣拆城築無勞休工息役活我曹

病中口占

擁疾高眠日影遲經營憔悴亂如絲莫思身後紛紛事只似生前曉夢時

吳述字芹泉萬厯庚申貢生

書齋卽事

年來無客叩松關
蕤苑窺尋消卻閒
劍出爐中金就範
輪陳堂下匠留閑
清詞得似清風好
蕪句應同蕪草彫
箇裏火傳誰識取
香山薪盡有眉山

驚迴殘夢語關關
似笑冬烘未是閒
寒欲欺衣風誘引
愁來尋客酒防閑
林中石聚筠添瘦
階下根橫蔓不刪
眼底紛紛何得盡
輸他山鳥占青山

陳用字仰雲號子行異子貢生任金華訓導陞長沙府別駕

紫硤文獻錄子行先生持身廉靜正直凡賑飢捍患與夫敦本睦族之事皆不留餘力嘗自謂曰居官與持家

硤川詩鈔卷二

七

事異而寔同稍涉利欲非所以報君親也因題其座右云一念若爲兒女計半生空讀聖賢書

寓中春晚

不信流光一擲梭
韶華九十又蹉跎
春隄綠遍裙腰草
煙岫青添佛頂螺
江北鶯花游興劇
浙西雲樹夢魂多
思量只合騰騰醉
莫惜蒲萄金叵羅

翠雲亭

山川無處問丹砂
因過仙人海上家
燕子不來寒食盡
一簾疏雨又梨花

沈一鳴字平叔布衣著有秋吟草

硤川志平叔家貧失學私從里師口熟之長而教授屢中以介特聞性喜繪事工花鳥或爲聲詩以自娛

春閨

夢斷愁難斷春歸人未歸去年新燕子依舊入簾飛

田家女

自分田家女來歸游冶郎欲隨郎意好新學畫眉長

沈元超字伯襄號慎臺官孟湖總練

秋日同友游瑞光寺

寺落城南僻人尋物外幽虛堂慈日護古塔法雲浮紅葉秋
光晚黃花野色稠況聞邊警息共爾好清游

沈復祖字伯逸號惺破布衣

次和吳丹麓白露日湖上

佳辰縱步興非賒底事年來鬢有華鷺嶺桂枝初破萼西陵
蓮子已無花扁舟棹處移青嶂孤鷺飛時帶落霞岸幘歸來

硤川詩鈔卷二

八

忘日暮前溪明月滿蒹葭

沈藩字伯翰祜孫諸生著西疇草堂集

紫破文獻錄先生爲紫硤山人裔孫嗜學耽詩酒樸園
稿日久散佚先生力爲搜訂序而梓之今猶有存者而
西疇艸堂集不可復得惟所輯硤川志畧
附刻蔣丹崖薰留素堂外集中今亦罕覩

喜東山嶽廟更新

嶽祀爰開魯分符冊此山海光晴練曳天闕暮雲閒禮樂高
羣望車書奠百蠻千年華表在笙鶴幾時還

沈端字子餘天啟丁卯舉人榜姓嚴著芸暉堂集

金陵曉發

疾雨愁江艇晨星喜乍零繞山初出郭隔柳見離亭日傍雞
鳴白天隨燕子青轉看成浩蕩煙水間漁汀

乳鴨

添得新流漱羽衣綠蒲風滿落紅肥可憐浪逐鴛鴦隊幾度
聞呼不肯歸

李輔字爾默崇禎癸酉武科舉人甲戌進士授温州府守

備後因監國陞副總戎以言事晉總兵賜蟒玉

紫硤文獻錄公雖習于武頗嗜吟咏鼎革後屏跡
居鎮南三里築圃蒔梅自號雲水散人蕭然物外

桐廬

桐君不可見遺蹟傳桐廬山靜如太古此言良非虛空翠接
平疇桑柘靄田園幽人無供給杞菊充齋厨一聲山鳥啁啾
焉睡起初晚風戛巖樹小雨滋畦蔬野店逢村婦不殊傾城
姝何當謀一醉媿乏腰間魚

破川詩鈔 卷二

九

周筵字無瑕號青羊諸生著有疑夢編

紫硤文獻錄青羊先生博學工詩風格清峻崇禎丙子
錢整菴倡萃社于破山先生年已七十餘哀然首列含
毫吮墨得意疾書可想見一時豪興乙酉八月破方被
兵因作自祭文及自輓詩全髮膚祈死年八十一卒工
畫蒲桃氣韻生動至今賞鑒家寶之稿久散
佚近得萃社詩選刊本一冊爰補錄如干首

相逢行

垂楊醮波波已綠清水照人人似玉孃娜風牽裙帶長一雙
驚起鴛鴦宿鴛鴦飛來觸畫船船中游冶誇少年含情顧盼
兩無語羨煞中流交頸眠韶光荏苒春欲暮欣逢曲岸花千
樹共惜相思別後深愁煙鎖斷蘼蕪路

次小青遺艸韻

江雲漠漠江水流江風吹花天際頭水雲無情渺空碧風花

偏上傷春樓傷春一夜知多少綠牕寂歷愁城繞聽徹啼鶯
血滿枝不堪淚落天將曉起撫瑤琴殘月少欲訴無人孤思
悄

玉山道中次星濤兄韻

山曉鳥飛盡客行愁獨吟羸童怯長路瘦馬畏深林不見人
煙處空聞流水音蒼茫南北徑寂寞轉孤岑

晉陵野泊

歲暮次江滸客心勞自傷維舟依野店沽酒對枯楊望極浦
煙起坐深山月蒼已知鄉國遠恨逐海天長

夜投荒村

荒郊夜投宿下馬古坡前艸舍問誰主蕪庭不記年無燈寒

硤川詩鈔 卷二

十

月照瓌壁破瓢懸當此窮途淚胡能不泣然

朱朗初齋

幽谷雲深徑閒亭竹隱門主人能獨往穉子亦忘言洗藥通
泉脈分花理石根超然遺世念殊覺性靈尊

留別陶大治

不堪秋色共棲遲雁度南雲欲去時分袂愁傾桑落酒采菱
懶聽榜歌詞蒹葭月冷孤帆宿楊柳風疏一笛吹念爾襟期
何處是燈前夜雨繫相思

訪岫巖李山人和項貞元韻

白石蒼松鎖晚霞山深知是避秦家主人聞客攜詩至自起

開門掃落花

題自寫蒲萄

自笑雄心久似冰支離癩散百無能明珠筆底憑誰惜聊寄
秋風與亂藤

山行

杉松凝雨竹吟風山北山南阻復通樵路欲窮幽澗轉人家

多住水聲中

早春廣福探梅

幾度尋梅山寺來傍巖纔得數枝開煙籠素萼分瑤島風遞

幽香出梵臺詩思欲隨春色轉花光不逐酒顏衰留連竟日

憑君興莫任飄零雪滿苔

自輓詩

硤川詩鈔 卷一

十一

附錄自祭文海陬硤記青羊周子維年月日將辭逆
旅蕙帷曉施松門夜啟聊備庶羞陳情所止湖爾初
生好讀儒書寄情山水混跡樵漁邁矣三餘乾坤艸
盧條欲歸真魂游華胥日月為燭風雲為車勞勞小
子手足放予遺體無傷本性密虧花落戀柯鳥病鳴
哀情或自牽物無常天生全食善善積大夢震醒幻疑冰
釋空心有底真閒無極原始要終誰免此日遶藤兒
孫若叩遺詞生平踐履我不爾欺自立
取瑜各盡爾為既親松柏曷復有知

土木形骸寄旅身向來久作夢中人
必情竊效千年計何德能延八十春
反照庶堪無愧影欲仁不害守清貧
今朝揖別塵寰去混沌天中養谷神

讀罷儒書謝網羅不煩道號更彌陀
清虛旨與坐忘合觀止功同主靜多
無孔笛吹三界曉獨弦琴撫萬靈和
誠明還我本來性位育寧須問若何

五岳三山有故居漫從冥路賦歸歎樂天不改最初志好古
多藏未讀書原悟浮生如寄旅今完眞性返吾廬布袍屐履
人間世他日重來孰識予

好囑兒孫且勿哀革囊卸卻損仙胎生平俯仰曾無媿去後
輪迴敢浪猜得越火坑空果報何愁慧樹不花開今朝我正
還元日長笑一聲歸去來

寄語親朋戚族知道人歸路卽來時色身稟受原虛幻雲水
相逢總散離平日勸懲蒙教益長年貧病感扶持追憶一別
成千古從此相思各不知

王化翔字洽甫崇禎丙子貢生

木榻

硤川詩鈔

卷二

七

偶依木榻晝長眠惘惘閒思總未然急上蒲團尋白業起看
日影過青甃祛除妄想棋三局磨耗雄心詩百篇斷送一生
惟有此花開花落作編年

沈抗字幼節諸生

九華山

峯色晴疑雨波光月映寒崎嶇藏徑路蒼翠溼衣冠老衲容
顏古仙禽毛羽丹遠帆夕照裏不異畫圖看

兩過菰港

去日岸柳綠來時灘蓼紅兩番花信異千里暮雲同

邵鼎字予大號雪青諸生著有竹中一刪

紫硤文獻錄硤中萍社唱和極盛凡十九人先生年最
少亦與焉東海詩選載先生集名竹中一刪詩選及萍

社集所存共數十首
惜集隘不能全錄

雪中懷

高臥向空山久雨掩林樾蕭蕭寒氣吹入夜轉淒切愁人不能寐悲風抑何烈曉起開南窗極目皓以潔始知栗冽中積此深夜雪宿鳥不敢飛空林如明月徘徊坐中庭呼酒聊自悅願言招我友其如山徑沒

行路難

富家郎年十五父爲經營母爲哺自小嬉遊靡不爲味賤膏梁衣賤錦曲房書榻飛塵土富貴驕奢已如此安用咿唔更自苦東鄰有兒父死母鬻霜昔日交親今道傍典衣買書黯自傷讀盡殘燈淚數行

破川詩鈔卷二

三

夏日山居

窗倚荒崖盡蕭然得自宜竹深客入想山在可言詩虛白列幽處孤青覆靜時泠泠羣響動涼意散前墀

贈別眉上人

杯渡從來事知君不可留在時原似別去後覺無儔一鉢白雲滿千山晚磬悠相尋復何處江上問閒鷗

雪中山望

不畏膠殘屐臨山正雪餘平雲失其白流水澹何居無處落雙眼我心空皓如梅花若可見攜酒過寒墟

春日

風吹細雨澹然情又見晴光幾片明芳草欲爭雙舞蝶綠楊

時換一啼鶯愁來只自陪書坐興到何妨載酒行爲問前山
誰處好隔林忽聽墮釵聲

訪友人村居

十里村廻靜者廬披襟人在竹亭虛座添清響茶方熟庭起
綠煙草未除數我春光歸短棹索君閒課有奇書論心早識
心俱素珍重交深古不如

舟晚

北去征帆影漸稀芙蓉灘下釣船歸扁舟日暮風吹急秋水
蘆花一雁飛

初夏

夢裏懷人渺隔江起來雨過水淙淙南風吹筍筍成竹簾捲

破川詩鈔卷二

十四

綠陰秋滿窗

閨情

春深小閣暖朝煙儂起梳頭郎且眠妝罷笑看郎未起枕邊
索取翠花鈿

樵李道中

愁中春去半未知春到否棹出湖光裏慨然見垂柳得失任
所懷奚覺余心疚鳥獨解余情好聲歌進酒撫酒忽復思何
以慰我友

客夜坐雨

淪落悲何極天涯此敝裘不堪今夜雨偏作一窗愁雲度鐘
聲濕風懸鳥夢秋淒然深坐處披卷伴殘篝

答崔星若見寄作次韻

帶水盈盈隔西風，每惜羣雁描霜外。字山落望中，雲雙劍何時合一燈。此夜分吳江，多好句何意得遙聞。

問吳余常病

君客西湖久歸纔，話榻前欲傾杯底。月知坐病中，禪扣竹吟應斷。眠雲夢獨懸何時同蠟屐，一嘯破山煙。

題吳余常眷秋閣

人境偏知此地寬，眷秋莫共買山看。雲凝檻外嵐千疊，浪湧簷頭竹萬竿。白眼不妨違世網，紅塵盍復到蒲團。雖君素擬陶元亮，欲問司田待挂冠。

東山風景久蕭條，小閣于今興獨饒。曖曖遠村低野樹，依依

破川詩鈔 卷二

五

流水挂溪橋，銜杯每念多。栽秫學草何妨更種，蕉竹裏雙扉聞叩者爲言田父置樽邀。

同錢聖月讀書秋稜山閣

不堪忽忽老，居諸春到空。山好卜廬竹，裏匡牀僧許借。雨中荒徑客來疏，鳥藏深樹能呼夢。風入虛櫺解揭書，莫問一鞭誰早着幽棲，聊共惜三餘。

同周青蘿鄭澗師周粲谷游碧雲寺

古寺攜筇對夕曛，翛然我意亦如雲。紅飄霜葉秋應老，白漲溪煙鳥乍分。就竹置繡閒試茗，當花踞石好論文。從教清嘯孤峰起，吹落松風野水濱。

綠覆雙扉一徑斜行吟不斷細煙遮堤牽柳恨時生雨池課
魚糧更落花欲覓好懷酬勝地且留幽思駐臆紗閉門靜坐
纔經月幸未匆匆負歲華

顧松字天齡

九日登紫微山

九日南州風氣暖早霜猶未著楓林楚天雲雨空朝暮吳會
江山自古今濁酒多情入盡醉重陽不偶菊何心疏砧野笛
秋聲裏信有牛山淚滿襟

周宗彝字五重號青蘿崇禎己卯舉人乙酉閣門殉節

紫硤文獻錄先生少負膽略尚氣節崇禎末飢荒頻仍
盜賊四起公與其弟璋光建關廂水柵捍衛鄉里甲申
聞變聚土兵保守乙酉八月大兵破硤公與弟俱死
之妻卜氏攜其二妾及其幼子以衣帶相結投後園池

硤川詩鈔卷二

十六

中死璋光妻馮氏亦赴池死嘉慶丙辰年奉旨列祀
忠臣祠稿久散佚此詩亦陸辛齋所輯雜詩中錄出

蠟梅

惱人芳度隔鄰牆山谷蠟梅詩
惱人香未展折向軍持硯席旁一自譜名

傳范陸至今風味壓蘇黃蠟丸漏洩春前信金鎖包含雪裏
香紅白未應爭色相清癯同骨不同妝

周啟琦字瑋光諸生乙酉死節

紫硤文獻錄先生戰死上東街父老感其忠義建小祠
繪兩先生像以祀今爲里眾妄毀改作總管堂遺跡遂
湮深堪浩歎又西山上原有周氏祠三楹亦里人建以
妥忠魂者歲久傾積今雖稍葺而依託僧寮蘋藻誰薦
亦非盡善也
特附識于此

山居

茸茸紅紫滿高岡雨後風吹橘柚香蟋蟀聲沉寒意近荻蘆

花發雁行長
山中雜煙霞
語溪畔松經
日月蒼野鹿
畏矰懸老樹
始知險阻遍
江鄉

寶劍歌

夜半雷雨驚
玉劍光自徹
高飛出匣鳴
思飲仇家血

范景尹字五甫
崇禎間歲貢
生官湖廣衡
州經歷

停舟赤壁

晨旭影熹微
篷窗暫息機
浪花疑潑眼
巒翠欲沾衣
屐訪黃泥坂
舟維赤壁磯
髯蘇那可作
懷古一長歎

聞人倬字自安
諸生

遠望

落盡棠梨綻
盡桃薰風取
次拂征袍艸
平隄岸渾如
翦春漲

硤川詩鈔卷二

七

河流漸沒篙
去國年深腸
欲裂登樓目
斷首空搔榻
來遠望情何
限不獨歸遲
嘆二毛

蔣珩如字荆山
諸生

石澗灘

家住南山下
川流盪山石
時見浣紗人
臨風長歎息

路接桃源徑
何如阿那灘
郎來上篙易
郎去下篙難

田徹字道耕一
號紫微山樵

紫微文獻錄
道晁先生明
季高士潘潛
山嘗贈詩云
紫微山前田
處士無異富
春有巖子煙
霞泉石本同
心野服黃冠
隱下里常將
逸興寄鳴琴
左列圖書右
墳史悠悠然
采藥鹿門山
聊復懸壺霸
陵市讀此亦
可想見其風
致詩不多得
近得東海詩
選中有茗上
行一集乃先
生游吳興留
題之作亟錄
數首存之

同錢聖月登雲
岫菴訪暉上人
不值

樹老蕭疏不記秋
芭鞋踏遍亂峰頭
疏鐘靜裏潮初落
黃葉空來寺獨留
鳥道微茫煙水積
漁歌多半夕陽洲
遙看飛錫孤雲外
笑倚寒松憶舊游

題徐叟蘆中

門外驚塵接遠瀾
羨君蘆寄一枝安
庭翻細竹風生岸
月滿疏簾雪在灘
書夢不醒長醉讀
劍花欲落近秋彈
蘆中可識人如許
百尺寒光海上看

問羅吳興道中
暮發風吹野
醉臥
更上孤
舟
扁舟晚發暮春時
茗雪煙中入夢思
今日空濛青嶂裏
漁歌牧吹總相知

道場山

破川詩鈔 卷二

支

翠嶺岩崕古道場
松風吹出石泉香
到來頓覺煩襟滌
潭影山光盡送涼

望湖亭

閒聽溪聲向水亭
松風吹得酒初醒
扶筇更上孤峰頂
幾折歸帆指洞庭

訪幻住菴

一帶煙蘿十里松
杖藜策策禮中峰
柴門尋到不相識
猶問前山隔幾重

登紫微山和唐章孝標韻

散步高峰上
披襟坐紫微
蒼藤穿石冷
古木礙雲飛
路僻苔欹
杖山空翠溼
衣隔林清磬
度明月送人歸

秋日過東山

短屐高登石徑斜
秋風吹老刺桐花
兩峰相照當明月
一水中分帶落霞
古寺深開黃葉裏
疏鐘遠渡碧天涯
蒼茫別是人間意
煙市橋連數百家

破川詩鈔

卷二

十九

人間意煙市橋連數百家

中衣帶帶雲古寺深開黃葉裏疏鐘遠渡碧天涯

短屐高登石徑斜秋風吹老刺桐花兩峰相照當明月

破川詩鈔卷二

硤川詩鈔卷三

里人曹宗載桐石手輯

受業顧瀾葛民參校

鄭雪昉字濯師嘉興籍諸生死節

紫破文獻錄崇禎丙子錢聖月先生結萍社于硤濯師先生亦與其列詩酒流連一時稱盛乙酉之秋周孝廉青蘿起義硤中先生袒臂一呼集者千人其義勇又如此後兵敗死節邑志作鄒雪昉因形似而誤耳特著于此庶後之纂志乘者知所更正詩文散佚今從萍社詩選中錄得數首

秋懷

谿頭雲欲散秋野一攜筇寒氣平衰草晴光上古松息機隨宿鷺生感在啼蛩況復逢搖落孤懷莫可容

自惜雄心老空教缺唾壺無詩招隱士有論著潛夫低閣琴

硤川詩鈔卷三

聲小空園鶴唳孤懷愁已十載踪跡比葫蘆

同陸韋公王介人言遠昆季集吳余常眷秋閣

深邨香稻黍孤閣對潺湲近遠霜前木空明月裏山看漁歸

柳岸遲客到蘆灣極目高天外閒雲共往還

吳維修字余常死節

紫破文獻錄續耆舊傳載硤中萍社集共十九人硤居其四周斑青羊鄭雪昉濯師部鼎子大及先生也文采風流概可想見乙酉歲先生從俞公元良起義邑中相隨死節固不徒擅勝詞壇見重也

同王介人渡西陵次韻

行行窮日力既陸亦登舟波遠靜如止峰多過若流長天容落照良夜獨饒秋檢點頻年事當侈鏡裏游

郊外

烏藤吾舊侶相伴踏郊坵草色侵袍碧山容照眼青苔磯春
水艇柳岸夕陽亭箇裏誰橫笛清聲入窈窕

姜思宇楚思諸生殉節

紫硤文獻錄先生生丁明季頗負氣節與龍山祝孝廉
淵友善講論實學篤志砥行乙酉之秋絕粒而死夫人
俞若節四十餘年撫孤成立事詳邑志而先生殉國尚未表彰殊爲闕事

青草

青青眾草微生機無停滯雨露積華滋流光吐鮮媚題鳩後
先鳴芬芳盛久恃僥倖春風吹悠然周子意王孫不來游空
庭甘位置懼等土芥賤蹴踏遭世棄

周明依字仙佩諸生有梅園詩草

紫硤文獻錄梅園在紫微山麓初名率園先生所築也
中有二近山桃源洞香夢窩諸勝朱一是有記查伊璜

硤川詩鈔卷三

談仲木陸冰修及先
耘菴公皆有題咏

題香夢窩

洞壑幽深暑自涼石牀松影靜分牆烏啼花外驚清睡醒後
茶添夢亦香

談遷字觀若號孺木

紫硤文獻錄先生性好博綜久不遇益肆力于子史百
家之言尤諳列朝典故所居破壁頽垣門後設一几憑
而著書崇禎壬午嘗受知于陽城張公愼言膠州高公
宏圖甲申高又相張爲冢宰高以處士諳典故欲薦入
史館力辭乙酉歸嘗綜十五朝實錄正其是非補其闕
文成國權一書後被盜竊其藏積更從嘉善錢相國龍
錫借書編纂復成之北走昌平徒步百里哭拜思陵西
走陽城欲哭太宰未至而卒所著有海昌外志棗林雜
俎傳抄幾遍而棗林集從未之見近得
東海詩選獲睹先生之詩亟錄登之

西湖

清暑沍薄暮移景成素歡千峰似釀雨空濛淡林端綠池方
朱殷繁紅不忍刪人生貴適意不必紳與弁湖上行游者一
一矜綺紈其才傲當世眉山可衙官悠悠千載後故紙誰相
鑽

題徐道力壁上墨梅

猛龍蜿蜒幾千尺下挾風雷噴四壁天公激怒醒長夢左耳
割入華陽洞怨血流腥涌墨雲枯鱗脫盡三江棟蒼髯筆筆
皴莓苔寒冰晝裂橫飛來長風萬里吹不落羌笛關山易蕭
索

徐曠侯先輩北上

雁陣寒馬蹄苦長安梨花半飛舞帝京空有黃金臺平津東

硤川詩鈔

卷二

二二

閣何時開綠楊依舊江南路秣陵草色袍如故春風吹送木
蘭舟秋色猶憐桃葉渡疏髯短鬢不解愁黑貂時欲換羊裘
會將對策董內史博取乘車馬少游

緹騎行

木鳳高銜漢殿右內前駕帖鈴螭紐重重照入自皇城又見
白鞞驕里堠先朝持戟坐長安日聽鶯聲喧御柳于今訶察
相糾牽貴臣往往死道邊蜚章夜入深宮裏黃紙晨驅西市
前司隸校尉雖有權不如都人得夜眠

吳江道中

超遞松陵北秋聲聽不齊晴蘆吹似雨繁蟹賤如泥震澤遙
通市垂虹靜過溪遙知楓落處何樹可相攜

九月見螢

落葉蕭蕭下流螢續續飛那堪憐暮景還欲傍寒衣歲晚情
為短光疏草漸稀秋江有釣者好去照漁磯

偶成

霜林飛葉盡空枝屋角青山日影遲好事頻求鄰圃竹閒居
長負故人詩書多顛倒燈難理夢苦留連醉未知城下淮陰
如可見於今豪市少男兒

句容道中

村鴉低啄下山田瀟瀟溪聲徹道邊複嶺數重雲過破穉松
幾尺翠生煙輿臺爭說丁宮保賓仙跡多迷葛稚川曲岸蘼
蕪春草綠王孫取次著歸鞭

硤川詩鈔 卷二

四

高相國擬薦中翰泣辭四首

甲申五月高膠州相國語

亦狗情否余對日中興方始何言狗情相國曰若然當
薦足下余曰國家之禍書生之榮萬不敢當相國色沮
余乃曰某歲貢亦近何藉此相國曰中書應舉亦不礙
也自後相國屢以為言八月屬余草疏既脫稿語余曰
今日且填足下名余力辭相國曰不佞雖去國必以足
下屬相厚者毋虞日後余曰士固有志向嘗言之矣某
在幕少效尺寸非敢有他望相國曰然則足下亦為家
計乎對以貧骨一具第安之耳因泣不自勝相國默然
而退作詩四首以志感

朔雲燕樹近如何敢為憂時改薜蘿獨上新亭流涕淚期廻
東海洗干戈熙朝養士非云薄相國翹才不厭多耿耿此心

容未昧私將擊楫誓江波

竊向江南泣楚囚孤踪蕭瑟似依劉身除君父恩誰重位到

公卿死即休環海莫非戎馬地終天難釋整龍愁書生飲慟

雖無益自愛懸鶉一敝裘

先齊王蠲漢逢萌未有衣冠榮此生若借薦書邀尺組轉令
寒骨負華纓愁中清角餘邊恨夢裏啼鶉帶楚聲詞賦自知
非大業相如徒爾渴金莖

東閣初開漢相尊昌黎奏記日盈門時雖秋入愁人賦事正
春餘望帝魂薇省茫茫天北極草衣落落客西園生平涕淚
無多着纔說榮名聲已吞

高相國解組同宿石城門

江左艱難又挂冠九秋風露共高寒東山安石初聞命南渡
李綱早罷官不爲蕪鱸思故國方憂戎馬競奔鞍石城橋下
秋來水澹似寒泉比釣磻

硤川詩鈔卷二

五

西湖廣化寺弔甲申殉難諸公

音容猶對此湖山太息新亭淚已潛填海漫銜精衛恨驅潮
長怒子胥頑岳家雙塚愁相近蜀國孤魂杳未還天外露盤
辭漢遠禁門誰問舊銅鐙

臣心如水有同醒湖上青山似畫屏寃血三年曾化碧騎箕
萬古亦爲星險途驚見黃牛腹新曲愁聞白雀翎堪歎西陵
松柏路祇今噓氣叱雷霆

宣城謁楊藐山先生話舊

宛陵避地子城西冬日攜家春杖藜欲買鶴田先立券將開
魚沼已沿隄衣冠江左多流寓事業朝中易勃籛相歎永嘉
去不遠與誰共聽汝南雞

邊詞

白龍堆上草先秋元菟城南雨亂流少婦不知邊塞苦時時
飛夢到涼州

瑤瑟怨

碧天如水月如霜午夜江清鶴夢長七十二峰南望處一時
秋色上瀟湘

張嘉炳字石渠號陶菴

紫硤文獻錄錢公豈塵先生婦翁也本居鄞縣後錢螿菴奉父寓西山南麓先生遂相依居硤與周珽青羊郭澹彥深周九巽公勛張道澹深之劉復公來李明嶽青來陸鈿韋公查繼佐伊璜王翹介人蔣之翹楚穉吳維修余常王施言遠錢肅樂希聲鄭雪昉濯師部鼎子大錢光瀟聖月浮屠大皷枯雪林壁竹懸及先生共十九人結葦社詩酒唱和極盛後以事牽連入獄事白得釋隱于醫藥籠所入藉給朝夕愛藝蘭兼工繪事其兄弟

硤川詩鈔卷三

六

寓書招之不復歸

游廣陵梅花嶺

不到名園久江湖續舊游有詩酬水部無月夢羅浮草色迎
人媚鶯聲選樹幽登臨情未已客思滿揚州

同高元若舅氏登刑曹白雲樓步李于鱗先生韻

聞雞時起舞顧影尚沈冥放楚悲時事依劉感獨醒寸心干
古白雙眼百年青無限登臨意胡笳不忍聽

秋日同韋公聖月過朱將軍廟次韻

性耽嵇子癖客至亦科頭杖策花前寺攜尊竹裏樓溪迴丹
樹合天際碧雲浮斜日將軍廟秋光坐更幽

送馮元度翁坦人北上

寒山疊疊片帆西把袂長懷罨畫題燕市東風新索驥蕪城
夜月早聞雞詩裁梅影香生夢杯瀉林光雪滿谿遙憶曲江
春正好莫遲錦字慰羈栖

大悲閣探梅

閒情引過梵王家鄉夢猶驚隔斷霞多少客愁消不盡可憐
瘦影似梅花

曹元方字介皇號耘蓮又號耘菴崇禎壬午舉人癸未進

士除兵部職方司主事辭補江南常熟縣知縣擢吏部

文選司主事陞本部員外郎轉驗封司郎中加視師御

史著涪邨詩文集涪邨家誠初二集

紫陝文獻錄先高祖性秉耿介遇事敢爲通籍後北都
陷赴南京閣臣馬士英欲羅致門下題補兵部職方主

涪川詩鈔卷三

七

事公辭不受願循分補外吏語侵士英遂改授常熟令
邑頗煩劇公寓撫字于催科循聲大著知事不可爲棄
官歸問道入閩授吏部驗封司郎中適侍郎公亦由海
道至閩破侍郎公投身百丈巖下不死公扶以歸而侍
郎公竟以感憤疽發背卒公乃築東山草堂于涪栽花
墨石吟詠終老詩宗劍南直抒胸臆而英偉之氣時隱
見于楮墨間

送吳慶百北行

秋後雁初飛游子挂征席纔衝雪川雲忽步吳閭陌遙望沙
草黃俯視江月白羸僕騎瘦馬茆店棲吟魄雜沓異國音寂
寞鄉思迫在家事蹉跎出門憂困厄慣擎湖上杯豈諳長安
弈惜此清朗晨難度風雨夕願君學容與毋效洛下癖

雜感

英雄趣將盡神仙乃其始五湖蠡泊舟赤松良倒屣棄官入

茅山大議谿不止衣白山人還亦欲隨李耳所以異韓彭終
不同兔雉神仙以爲名不過遠禍爾上蔡東門犬華亭鶴徒
倚當其貽悔時心羨羊裘子羊裘卽神仙超然無可肯落葉
點鷗波釣竿重青史

莫思行

思到窮時思且止千思萬思無一是明日悲樂今不知百年
變態皆如此痛哭不必如賈誼縱酒不必如劉子功業不必
羨韓彭富貴不必慕許史家貧浩然餅鬪恥高歌擊筑臥燕
市春風秋月常相似且與農家講耒耜

看花

花到春晴次第開花開剛遇颶風來況兼密雨灑莓苔也當

硤川詩鈔卷二

八

三春開一回我來看花但欲醉不管花榮與花悴何樹花開
能不老何花落後能不掃掃卻落花三徑淨花開花落景皆
好

壽秋岳先生

莫言窮居多寂寞寂寞之中有至樂莫言閉戶多貧苦貧苦
益人非小補如今才士矜博學學問有用始卓犖如今舉世
重高名名心作僞無所成容膝不必營繁囿梁園轉眼荒草
茂縞衣何須列青娥吹樓將墮遺恨多鍛鍊鑽核固委瑣結
髦蠟屐亦累我大雅怡情古書畫走舸複壁豈佳話種種眯
目與糊心君今盡掃滌煩襟鐵舟老木高崔嵬倦圍怪石生
蒼苔月下奚囊收好句花間竹笠覆霞杯仲蔚門前草漸長

陶潛石畔柳堪賞，鸛鷓百結立紅樓。雙鬢笑語相拊掌，舊客
新知侯門去。新鶯乳燕吾廬踞，一聲鐵笛五湖秋。白雲無盡
水東流。

辭兵部主政

銅墨傳家舊兵符，一代新河陽。甘製錦，建業忍垂紳。才拙安
微祿，時危重牧民。拜稽隆古意，交讓諷臣鄰。

送凌弼丹威還潯水

送子獨歸去，相看老淚零。帆隨飛鳥沒，山向亂雲青。負米延
衰母，謀生棄一經。艱難年少意，筋力已伶仃。

碧山病

僧老似古木，臥疴閉梵宮。當春一夜雨，滿地落花風。世事溪

破川詩鈔卷三

九

邊石閒情，天外鴻有人問榮落，笑指路東西。

贈淡哉開士

石屋容趺坐，十年換物華。枯龕依凍壁，破甑傍秋花。煙合山
迷路，血殷字有霞。胸中無一事，早晚聽啼鴉。師日刺
血書經

送徐遠章北上廷對

秋風飛一葉，門外馬嘶頻。獻策明時早，聯鑣落日新。贈行辭
五柳，問路指三秦。衰艸含愁思，依依欲傍人。

人事

人事憂難盡，如何更慮天。升沉隨物變，晴雨任機緣。自煮蘊
蘆水，時乘書畫船。悠然天地外，遺世且高眠。

武原歸舟

廬

西東

廬

攜琴尋釣艇溪岸是吾家樹密牕常夜霜深葉變花竟無彭
澤酒止有邵平瓜回首望秦駐翛然天一涯

落花

卸卻輕裘換箬冠曲欄迷路問人難頻經零雨頭應白未散
餘香心尙丹卓女錯拋傾國色西施悔出浣紗灘從茲高寄
東風下不願游人帶笑看

送陸冰修游白下

送子蕭條入舊都滿江煙雨踏春蕪依然草色青村店悵矣
梨花點客途幽恨尙留桃葉渡遺香猶訪莫愁湖烏衣子弟
今餘幾細柳新蒲話酒壚

寄胡彥遠

破川詩鈔卷二

十一

巢許蕭然物外身乾坤敢問屬何人梅花枝發山中麻竹葉
杯浮洞口春孺子不來誰下榻遠公已去悵迷津時玉林
往都下

送朱岷左六月上計車

整鞭重理舊談經老友扶筇送客亭驢背平康頭半白酒杯
燕市眼多青燒琴莫怨音知少罵鬼惟憑文有靈誰買長門
新製賦夜深偷看斗間星

朱方菴同年歸自燕都過訪話舊

帝城春色帶歸鞍澹泊依然處士看隄柳乍濃鶯語煖庭花
欲落馬嘶殘文章自古兼經術交道於今識歲寒此世憑君
重整頓不才雞犬逐星冠

約汪曾城同哭韞生

約君若上訪柴扉今日若溪事已非繞徑松陰孤嶼出滿樓
月色故人稀圖書牘有閒雲護泉石空留野鶴飛白馬素車
期范式死生從此淚沾衣

題朱葵石鶴洲園林

邯鄲夢斷久徜徉雪彩冰姿眉髮光雞犬偷將丹鼎試禽魚
喜近石壇旁閒隨釣艇蘆花睡靜讀方書藥艸香更覓人間
九老伴衣巾盡染女華黃

春日訪友

漲水新船泛碧空忽驚春去恨恩恩平沙草長連谿綠野店
桃開帶雨紅少婦村妝存古豔故人南去歎交窮韶光入眼

硤川詩鈔 卷二

十一

皆如醉閒看游人一夢中

春愁

心上眉端已慣經那堪無伴月中庭落紅滿地人千里芳草
連天酒半醒啼鳥自嬌顏自老梨花偏白柳偏青尋思何計
留春住癡向東風倚畫屏

冰修遠歸

三年裘敝寄漁陽駿馬長鳴踏曉霜作客歸來仍是客故鄉
夢去認他鄉蒿萊穿徑呼誰刈蘿薜牽垣似我狂壯士解推
餘赤手欲邀鄰叟苦無觴

偶成

徧訪名山金粟賤購求不惜賣文錢消磨長晝棋三百料理

頭身佛十千畏客常推梵宇住抱孫時向草亭眠荒拋花月
緣何事爲註逍遙第一篇

野步

春郊無伴獨游行柳碧花黃麥隴清藤杖乍驚小犬吠短籬
漏出讀書聲茆菴閱世多興廢古木依人幾變更不問主人
閒看竹籠中嬌鳥夢初成

寄子木從叔祖

離愁欲語洗蒲尊遙望家園薜荔村飄泊乾坤何處宿凋零
兄弟幾人存干戈百變偷生健花月多情餘淚痕老屋數椽
思手澤安居不獨戀江明

過胡天岫藥肆

硤川詩鈔卷二

十三

市肆嘗懸賣藥壺空階葉滿徑成蕪三芝秀結黃公石五柳
秋臨青草湖醉臥盆邊貧自得詩吟海上道偏孤焦桐挂壁
音仍在誰識高陽舊酒徒

樓頭

樓頭又見月嬋娟觴酌歡呼憶去年自覺顏衰羞對鏡每逢
書好恨無錢飛雲驟雨塞翁馬淺水蘆花漁父船若把世緣
冷眼覷滿園蝶翅總踟躕

寄吳慶百

岸幘揮毫嘯且歌兩隄花事近如何釣船橫渡點紅葉丹鼎
安除藉綠莎喜睡墟邊嘗酒熟愁吟湖畔看鴻過煙春雨晚
閒瀟灑不似簪纓憂患多

湖嵐林靄繞籬屏終日飛觥坐綠汀半硯冷雲吟未就一軒
涼雨夢初醒墨霑池石苔痕黑柳染釣船魚尾青雞犬茅茨
多古色知君匣底有丹經

山邨獨步

邨籬繞徑菜花黃蜂蝶紛紛採摘忙隔岸數峰添嫩綠前谿
小艇臥殘陽荒園桃落圍脩竹獨樹鶯啼對海棠縱步不禁
生感慨故人四望漸蒼茫

寄朱岷左

旗亭風暖酒初香殘醉依稀知己傍老去情懷渾似夢春來
花鳥總堪傷慚無裨補非男子幸有和鳴共肺腸莫道衰齡
忘繾綣離愁更比柳絲長

硤川詩鈔 卷三

十三

幡然二耆隔紅霞一在山巔一水涯好鳥歌中思往事暮鐘
聲裏送韶華著書長晝光嫌短札友忙時字半差常步昔年
吟諷地山牕燈火接朝霞

送張球仲之任烏程卽步留別元韻

少年作客問雲程遙指千山暮靄生萬緒蒼茫投筆去一官
清冷拂衣行新愁細雨隨帆轉舊恨斜陽對酒傾咫尺琴書
應不遠好將秀句寄春鶯
掉鞅詞壇志氣英蕭蕭行李赴菰城橋門收拾諸豪俊鄉國
飄零舊弟兄民事宏通稱達識官家優禮重儒生獨屏藩陸
芬華習歲節雍容拜老更

八十自壽

少年意氣勝虹霓文字緣深心似迷
半夜秦淮潮未落五更鷺嶺月懸西
桃花隄上衷如結紅葉牕前手自題
祇望昇平懷獻納銅駝何意草萋萋

遭時偃蹇悟前因雖不長齋膳下貧
紫芥泉烹瓷供客古槐葉落竈添薪
縹緗架上饒千種故舊門前無一人
馴虎毒龍嘗共臥忘機何物不堪鄰

兢兢家學與師傳末劫嘗思則古先
缺陷頗知安我命經營那肯受人憐
偷生不敢談忠孝保志還堪對聖賢
莫厭尋常趨幻怪耕田鑿井樂餘年

蔣丹崖勸刻新詩賦以答之

愁緒淒涼又雁聲蘆風初起稻花迎
城頭戍角催疏鬢野外

破川詩鈔卷二

十四

樵歌傲濯纓詩卷看來皆是淚
竹牀眠去每如醒江山浩劫猶灰燼
那惜浮沈身後名

年衰

誰謂年衰氣漸平紛紛落葉打愁城
故人夢裏談興廢古史燈前論甲兵
隱慕潯陽誰是伴遊思蓬島尙無成
杖看返照千山影辜負籬邊菊數莖

短布單衣瓢自操虛名謝去灌東皋
翻書不信身垂老說劍猶誇氣尙豪
詞客叩門吟好句幽人對榻諷離騷
蕭閒忽忽年光換歷盡人間棘與蒿

偶感

事功名節古難兼何況貧寒福力織
與世無緣甘袖手遇人

得意且掀髯，財成竹屋梅。千片受用松，隱月一簾自。分生涯
安隴畝，何須詹尹卜幽潛。

行吟

行吟纔罷典春衣，獨坐沙洲看翠微。吾道漸凋同志少，世人
久謝叩門稀。空庭鳥啄青雲落，遠渚菰肥白鷺飛。殘雨一天
虹乍散，擁書萬卷掩柴扉。

喜近修麗京過草堂

門前垂柳挂詩筒，共說相思賦草蟲。英俊有心趨患難，乾坤
何意復鴻濛。如晴竹影窗間月，似雨桐聲樹裏風。且說荻蘆
高枕臥，曉星未上莫推篷。

縉溪聖水泛孤航，潦倒東山舊草堂。未道別情知思切，重提

硤川詩鈔 卷三

十五

往事共心傷，栖遲遺老追。南皓飄泊同僚半，北邙且聽流鶯
勸。行樂夜深攜手上，河梁

過朱葵石東山

劫灰幸不到，城隅半勺清。泉藏野鳥縱，步曲廊思噩。夢高歌
卷石，換清醕。三間春曉梅花屋，一幅秋山落葉圖。袖裏乾坤
如許大，長房何用覓懸壺。

飲秋翁倦圃

小山匡坐夜談經，燭影相看酒未醒。賸有茅堂懸木榻，別開
花閣護金鈴。關河歷盡三生夢，詩卷吟餘兩鬢星。圖以倦名
人未倦，牀頭猶自挂青萍。

往武原

最愛沿溪九月霜
白蘋紅蓼鬪新妝
樹頭綠刺藏丹橘
岸腳蘆花覆野航
處處漁燈誇紫蟹
家家爨火貯千倉
抱孫搔髮無餘事
手把茶經看築場

貫徹禪師過訪

春光猶是客情非
門巷東風坐釣磯
舊恨斜陽鴉正沸
新愁細雨燕初歸
幸無剝啄來爭席
喜遇高閑數叩扉
悵矣莫提塵世事
清明社鼓正芳菲

春歸

梅花初放鳥初啼
漠漠晴煙十里隄
又是春歸風味別
離人閒倚玉欄西

禾中旅寓

硤川詩鈔 卷二

十六

已帶黃冠著羽衣
柴門深鎖落花飛
多情只有梁間燕
獨向閒房說是非

鄰家

鄰家修竹喚啼鶯
百轉頻將午夢驚
儂愛聽鶯偏寂寂
近來花鳥學人情

秋夜

斗轉河橫庭有霜
旅人反側厭空牀
非關夜永添新恨
自是愁多夜更長

驟寒

日暖風和霜未凋
西疇刈黍漾輕橈
籬頭鶯粟催衣急
不爲貧兒遲幾朝

小游仙詩

桃花流出水溶溶雞犬前村雲已封怪石溪邊煮白葛圍碁
洞裏賭青龍

客至

風高鴉噪夕陽前漁子泊舟曲港眠正值小山新月上叩門
有客破涼煙

姜曰儁字同水著有紀年草

紫硤文獻錄紀年草前有郭彥深序稱其有才不遇
而逢掖老時寄其幽思牢愁于腸咏之間又其自跋
有云乙酉放廢之後勃勃欲語然卒不解詩遠丙戌授
經語水郭氏獲與彥深先生游偶爾學步彥深先生不
檢指授孩子兩年間得其鉞袞矻弱之力居多讀此數
語亦可想見其梗概矣紀年草亦載入東海詩選中

田家雜興

硤川詩鈔 卷二

七

春風自東來晴雀噪矮屋農事長子孫豈辭長碌碌既栽高
原桑亦播下邳穀日暮還杖藜行人過空谷相向問城市徭
役何迫蹙

同徐似車莊無芥吳公礪泛鼎湖

昔聞鼎湖名今見鼎湖水巨浸出高原云是神靈使偃滯平
山陽環周十餘里近攀震澤雄遠亦郎官比小艇凌晨進一
望清且泚舉櫂觸寒水流澌不得止長風天際來日腳明沙
背浩歌發中流鳧鷗四面起肅肅高下飛晴雲落遠埃遠埃
翳荒葦漁舟正深艤疑有桃花源神仙在其裏顧盼窮青冥
煙凝暮山紫

語溪曉發

稀星立野月低樹棹歌吹起前邨霧邯鄲枕上夢初回遶渚
揚舲疾如鷺飛鳥游魚各艱辛丈夫豈能忘賤貧百鎰黃金
三尺組紛紛役盡早行人

春日雜咏

生事逢搖落兵戈有歲年上書才士後投筆眾人先金貨監
河粟囊留阮子錢春風不相借愁坐聽啼鶉
寂寞沈思久扶筇一浪游野田低出雉沙渚暖藏鷗雨滴蒲
根長風吹柳帶柔且呼桑落酒爲解黍離憂

庚寅移居雜咏

三徑初投足柴門對水開岸欹鳧浴雨土圻筍驚雷壁有新
題字厨無舊潑醅蓬蒿殊未滿應信客重來

硤川詩鈔

卷二

六

橋李感懷

煙雨樓頭水滿蕪傷心不是舊鴛湖靈光古殿屯軍壘金谷
名園牧馬區日落荒雲悲去雁月明殘夜怨啼烏當年越絕
誇奇蹟翹首空瞻范大夫

秋興

若將萬事盡相拋迤邐尋秋赴遠郊寂寞園林餘鳥雀亂離
門戶滿蟪蛄輪邊飛輓衝霜出向夕清砧帶月敲便擬子眞
居谷口不知何地可誅茅

黯淡斜曛下夕坡魯陽戰罷不揮戈宮開碣石悲笳動臺築
黃金介馬過夜雨荒陵窺玉盃秋風衰草泣銅駝江淮北去
三千里擊筑誰爲壯士歌

石頭城畔草蕭蕭，豐鎬雄臺痛寂寥。
旌節竟移蘇屬國，雕弧虛擁霍嫖姚。
雲霞天闕空殘照，花柳秦淮咽暮潮。
舉目河山風景異，祇應沉醉老漁樵。

輕舟五兩過錢塘，宿昔繁華付渺茫。
萍泛煙湖荒釣艇，雲封山館罷飛觴。
悲風清角嚴城裏，秋草黃塵古道旁。
惟有西泠最高塚，南枝猶自鬱相望。

芳草王孫落日邊，西南天地隔風煙。
舳舻曾向荆門下，羽檄虛從粵嶺傳。
山抱亂雲迷隱豹，江銜宿霧墜飛鳶。
秋來雁足書仍杳，愁聽征鼙動暮年。

自歎

自歎生身磨蝸宮，頻年愁坐欲書空。
元經倦草羞揚子，丹術

破川詩鈔 卷二

十九

難成笑葛翁，兩鬢雪霜明鏡裏。
數椽風雨亂蒿中，蕭條無計回時命。
只合孤栖學冥鴻。

清遠樓述懷

飢來驅我出門庭，一徑疏篁轍乍停。
望絕青雲新獻賦，分甘白首老傳經。
草深檻外飄書帶，風滿樓頭和說鈴。
博得山資心願足，歸謀蔬圃課園丁。

病起

春半沉疴客過稀，經旬不啟舊柴扉。
朝來窗下科頭坐，楊柳成陰燕子飛。

硤川詩鈔卷四

里人曹宗載桐石手輯

受業顧 瀾葛民參校

陸嘉淑字冰修號辛齋又號射山鈺長子處士著陸辛齋

集辛齋詩話

吳樵石輯硤川詩略自先生始詩略中有詩話者悉為附載

吳樵石詩話辛齋先生星帶堂集詩皆作于前癸未先後先生少作也古豔纖雋極才人之勝致蓋取材樂府

而出入于長古義山間近詩人之汲古者大約上溯三唐而上漢魏六朝罕問津者故亟採如干首于卷端

紫硤文獻錄宏才博學代不乏人峻節清修自公罕觀先生為真如先生哲嗣鼎革不真如先生殉節自公遂不

應有司試工詩文善書畫名公鉅卿交相推重康熙已未舉宏博有欲薦公者力辭不就風尚高潔彌堪欽仰

詩極宏富古香幽豔撲人眉宇

古意二首

硤川詩鈔 卷四

冽冽北風發流澌蹙寒凌楓葉隕黃綺江海波濤清月滿海
水壯月缺江水平月午濤復湍月落波復澄何來遠方客尺
素傳微情區區託短札中慄豈能傾所重故人意珍之過連
城

立功萬里外走馬埃塵絕丈夫諒雄飛何能泣離別龜沙接
龍城瑀弓射胡月長劍凌并霜短裘狎邊雪錦字織成書致
之自於越寄言覓封侯壯心浩難滅功名指顧間弗愁朱顏
歇

雜詩二首

芝草不盈尺豫章高千尋貴賤在光華所寶非其形明珠或
徑寸照耀十乘輪良玉韞頑山石埋崇精神薜荔蕃便娟蘭

杜披靡生託根豈僻遠採折嗟遺榮一旦充紉結雜佩揚芳馨芳馨不自發何以爍凋零

梁木大一圍所支千萬鈞懷抱慕功烈貴當要路津雲霧壯
霧蔚蛟龍載威神山岫發宵窈虎豹栖幽冥所處苟違地徒
使賤者輕良驥造千里頃刻越都城舟楫截江海揚橈無勞
辛操術洵已殊寄託得其倫無容曳長袖感慨悲生平冥冥
鴻羽高世途方昌明

入皋亭山

深山滿煙靄杳杳青蒼殷山下居人稀幾家臨水灣山人失
世俗垂手竟日閒我來但一揖便坐看青山自言里俗淳外
戶夜不關口食計種樹金爨給樵攀山田不抱瓮溪水常潺

硤川詩鈔

卷四

潺避世何必遠此己非人間雖無良友朋吾輩足往還欣然
起長嘯爲爾破憂顏

題畫障

湖陰一舫依岸宿誰借曉煙隄柳綠青山如障放晴雲搖蕩
波光金筓簌鴛鴦之浦比翼栖春水陂寒三十六樓閣參差
城半隈前峰細細闌干曲

采桑曲

江南二月青陽天桃花匝市楊花顛流鶯自語元鳥斜陌上
誰家雙鬢雅繡箔柔筐臨碧配百帖春蠶眠不起素腕迢迢
倚夕陽清曠的的回秋水別有梅花洞房妾永日盈盈泪凝
睫織成錦字寄別離結成同心鎖笥篋偶向城隅恨自滋長

緩策凌晨去湖光照眼明雲連山色起風約水煙輕斷靄微
零雨新陰屢變晴段橋漁艇出眞足寄浮生

與爾同爲客蕭然江上身雪濃初送臘梅凍尙禁春短燭愁
花炮長宵厭鼓勻商量度除歲眞擬向誰人

一尊婪尾髮鬢鬢隻影支離定不堪朔雪幾曾騎薊北春風
知否到江南心隨千里遠鄉雁身似三眠未繭蠶聞道征篷
便堪挂層冰今已渙春潭

草堂春雨共聯牀

山館秋風更舉觴往事追論今老大故人

峽川詩鈔 卷四

四

相向倍蒼涼征途樹色連春嶂官署花陰鎖夕陽強欲相從
不勝醉玉壺清酒夜偏長

謝子山過晤兼寄茂倫

惜別懷人不自持偶逢佳客喜銜卮賦家舊識參軍句詩品
爭傳記室詞燭燼畫欄人坐久霜凋青嶂雁過遲逋翁老去
才偏健每憶垂虹艤棹時

孤城飲馬競鳴鞭落日空湖蕩晚煙千嶂旌旂開畫角

歌吹泊樓船雲銷獨鶻盤空下月起疏燈對塔圓別有城南
愁思婦玉簫吹徹未成眠

對對秋夕上臨光願期即雲散山色賦風碎水獸騰

高梧過雨早涼生落葉驚風小閣清流火拂簷驚七月荒雞
侵枕又三更風傳戍柝淒時斷秋壯胥濤怒有聲獨起攬衣
頻徙倚十年衰病怯論兵

偶成

春溪如染綠微微廢圃猶存舊釣磯花發閒庭鶯自語蘚殘
荒逕客來稀紅鱗試子衝波上紫燕尋巢冒雨歸書卷盡拋
丹竈冷勞生空悔昔年非

再答道晁

山城寒角咽風頻屋瓦重看霽色新每厭禽聲爭報曉更無
花信肯催春亂鴉我自渾塗乙幼婦君偏送受辛何日當湖
容放棹看山應待白頭人

硤川詩鈔 卷四

五

送友之越

老去誰能再據鞍山川搖落鬢毛殘不伸一指何妨屈儘谿
雙眉莫用攢吟嘯不知華歲改寤歌無恙碩人寬側身天地
還相向風動枯桑海水寒

燕歸東里中諸子和韻

回車何必爲朝歌曾聽良箴響震鼉冰雪載途催臘近舟車
頻換計程多丹黃代起絲難素琚累誰芟玉未磨敗礎積垣
節溪地憐君曾爲幾經過

舊事何堪計夢華秋風蕭瑟泛歸槎老思炳燭知何益貧欲
逢年計總賒賒霜後霜前游子路江南江北野人家知君亦擬
山中老誰與同耕靈敏瓜

壬戌上元余將東歸再疊查仲韋元日韻以志別與
浮雲蒼狗變仍頻一局棋翻譜劫新牧馬嘶殘芳草暮乳鴉
啼斷故宮春歸從北固思丁卯事滿錢塘憶癸辛欸乃棹歌
君試聽漁舟仍有唱酬人

送張彥若

文昌樂府曲江詩風雅千年譜乘垂客夢秋隨湘水遠旅懷
春到薊門遲枕函自寶中郎論碑碣時傳幼婦詞長抱連城
應見賞斗牛光動已多時

蕪城感舊

花影鶯聲句偶傳無端眞得玉人憐劉郎前度身猶在杜牧
三生事惘然銀燭夜闌分險韻畫欄春半響么弦玉鈎斜外

硤川詩鈔 卷四

六

傷心處落盡桃花叫杜鵑

和耦長飲湘似齋

子夜尋歡未有涯乍令遊子失思家杯深不厭三條燭菊密
猶開十月花聚散驚心仍旅食騷愁堆鬢已霜華歸鞭共指
西山雪辜負桐江釣艇斜
江南詞客各天涯一笑相逢北海家夜永淥波搖酒浪坐深
寒粟卸燈花時才正變分詩品故國風流感夢華頻到書齋
君勿訝留賓每到月西斜

九日黑龍潭和陳子文

路轉城隅樹幾叢
高秋騁望遠天空
漁陽游俠悲遺俗
碣石
煙蕪鎖故宮
龍臥幾年潭草碧
鴻冥何處塞雲紅
登臨更勿

頻回首故國青山落照中

疏星欲墮朗孤蟾自愛秋來夕漏添猶白風塵被短褐不須
詩句諱香奩流連同調歡何劇潦倒愁襟酒易沾九日又應
成故事石潭西上一峯尖

疊前韻

平岡衰草散煙叢千載雄圖轉矚空猶見野雲迷黍谷獨留
仙梵隱花宮盧龍人去千峰暗銅馬塵消九陌紅指點西山
西更北玉泉鳴咽亂雲中

朱絃斜叩吐清蟾銀箭偏隨白髮添雁柱落徽荒寶瑟魚箋
無字蠹珠奩啼殘絡緯秋砧急淚溼芙蓉夕露沾強欲割愁
愁轉劇可能山似劍芒尖

硤川詩鈔卷四

七

九江道上

身世真同鷁退飛五更何事夢金徽白頭肯悔當年誤行腳
渾忘到處歸結社廬山成往事娛人秋色又清暉此來莫負
平生興未必雲山拒布衣

汎西子湖夜歸

舟小恰如葉夜深雲似山持燈泝流水人自段橋還

子夜歌

儂在樓頭立郎在樓頭望同根種蓮子所恨隔蓮房

漫興

新移書榻近南溪種得花枝與屋齊待放鶯歌弄春曉一簾
雲影石欄低

送王備五自武林之郴州兼寄趙叔文

河橋抗手不勝情
竚立風前落照清
千騎上頭君莫羨
羨君先傍故山行
三年游子尚淒淒
歸夢春來處處迷
羨煞南飛雙燕子
隨君直到浙江西

題半菴小照做柳枝詞

花梢紅日鳥聲喧
春思闌珊叩枕痕
莫怪三眠呼不起
最難收拾是春魂

潘廷璋字美舍號梅巖諸生著楮山樓集硤川志

吳樵石詩話樂府與古詩體裁既判音調亦殊須以不似似之先生樂府諸作微嫌摹擬太似故選自古體始蓋擷庚鮑之菁英者

硤川詩鈔卷四

八

紫陝文獻錄先生生當明季壬午以前四戰棘闈後棄諸生專事古學與陸講山陸辛齋諸公互相唱酬樂府古詩追蹤漢魏五七律端學少陵窮愁感憤歸諸溫厚

寓懷

烈士抱高情
要與日月會
雖無凌風翅
奮心千里外
左顧攬華嶽
右顧掖秦岱
滄海同一杯
長河若縈帶
迸入玉壺中
吐納無薜芥
淑景正嵯峨
羣氛已洶汰
長嘯激清風
陶然發天籟

至人不偶世
散髮在空谷
劉廉本逃名
越禮自驚俗
身廢道猶全
秉真媚幽獨
噍彼營營者
蒙恥苟榮祿
勁節旣樗敗
浮華如轉燭
已見高臺傾
朝歌暮成哭
惜哉明月珠
彈此飛生

肉

崆峒有道居冥栖絕追尋煙霞繞磻戶冰雪生衣襟我欲附
高鳥縹緲躡其岑朝攀碧城樹暮息璇臺陰酌我沆瀣漿悅
我瑤華音洞天基始罷玉女進鳴琴天雞已復唱海嶽徒高
深

白鶴坡

王屋西盡處亂石若牛蹲海路入溪口藹藹榆柳繁村家抱
水郭車碓互成喧小雨亂鵝鴨旭日散羔豚犁耕破沙觜鞭
牧穿雲根野廟落空坡門前溪水渾中有遊地人長作漁樵
言山僧具香鉢藜豆充朝飧勞生免執爨荷鍤隴上原桃源
日已遠結束尋雲門

曉起望南湖

硤川詩鈔 卷四

九

東風動時物日新高處目湖草綠未深隨風參差伏微雨潤
芳洲遙村隱朝旭隔水畫樓低煙青出膏沐蓀蓀湖海帆去
織來復續獨有持竿叟目靜湖南曲

古意贈陸麗京

捷徑都在山大隱何妨市吳門旣酒傭成都亦卜史廡下晦
時名牆東賁其趾緬彼肥遯叟施藥長安里陰功等平反利
濟故無己和光似埋照守介非徧矩跡邇神自超昔賢同仰
止

江陵曲

家住江陵風色好二月沙頭候春早玉釭春酒曉來熟出錢
江亭徧青草江亭青草別離初萬里蕭關可奈何馬蹄踏踏

欲長去雪霜聞道涼州多妾歌柳枝君擊筑楚聲未斷秦聲
續萋萋煙草向江深鷓鴣一聲江水綠

送君行

征人起舞慘欲別門外鶯啼芳草歇天涯空自結同心柳絲
更作千條折贈君寶劍碧連環玉壺提酒琥珀殷壯君行色
開君顏獨惜深閨花鳥闌送君騎馬長干路君去扁舟揚子
渡妾馬嬌嘶曲岸花君舟遠泊滄江樹良夜遙遙無限情兩
處相看同月明明月沉沉墮江水子規聲逐啼鳥起

醉後放歌

巨靈劈破西南嶽巨鼇撐起東南角中間有人氣若虹一吸
頓使滄溟涸興來雙手提玉瓶高歌獨坐春風亭車前兩騶

峽川詩鈔

卷四

十

足嘉客百杯相對芙蓉青昌陽胡姬正少年倚槽喚客楊花
顛驟裏橫來玉鞭墮欹斜重上壚頭眠鷓鴣且典供餘醉那
顧明朝無酒錢

髯參軍行

紫峽峯頭一片雲攜來把贈髯參軍參軍昔臥東山阜氣吞
雲夢胸八九興酣詞賦倒峽流笑傲春風踏花柳封侯未遂
空少年狂來常向壚頭眠四十專城竟何有顧影徒有鬚鬢
髯男兒要在能報國焉爲瑣瑣狗祿食奮臂不成死亦得天
吳入海東南愁孺子碌碌誰足謀我公把箸前爲籌一軍皆
仰蕭鄴侯臨節可斷將軍頭歸來談笑笑凌滄洲髯參軍氣如

雲

武林館中伯兄錢江晚至

西陵收晚渡及郭正黃昏夜火開江市秋星落海門異鄉雙劍合故物一瓊存近得家園信挑燈與細論

得家中穿窬之信

曉發南塘自海昌城至赭山湖

旅館回清夢驅車出海城微燈孤店啟殘月早潮平沙落黿鼉徙溪喧鵝鴨驚不辭衝曉瘴寒重覺衣輕

渡太湖

震澤東南戴縱橫勢不羣白含天目雨青插洞庭雲風擁三江合潮平五派分扁舟招不返彷彿弔湘君

泊柳上蘆花菴

水國寒無際輕橈寄渺茫蘆花先冒雪柏樹晚矜霜僧供蓐

硤川詩鈔 卷四

十一

絲淡村風柚子香暮潮猶未落佛火照蒼蒼

喜沈去矜避地至東江

喜逢避地士能作耦耕人柳市容沽酒花溪好問津氣同淮海壯情隔灞陵春若可長高拱何妨老角巾

湖上送王雙白歸毘陵

旅食錢唐久秋江木葉殘中原多戰伐客路正艱難曉月臨樽酒寒花簇馬鞍今朝南浦別何日寄琅玕

晚步東園

寄杖青門道閒園一徑通寒煙生翠竹暮雨溼丹楓卻遇忘飢叟還尋無是公忽聞清梵出乞茗到花宮

同沈令文徐格王素人子大登吳山大觀臺

吳峯高對越王臺萬里煙沙一望開南國河山依郭盡西陵
風雨入江來悲歌獨下新亭淚慷慨誰當絕塞才極目桑榆
愁落日幾時春色轉蓬萊

同白方閣伯幼吉冰修集郁儀臣齋招同梅村太史及
陸道威翼王周子俶王惟夏郁計登許九日諸子

高館華燈尊酒開芙蓉煙月下池臺三江潮落吳魚集九月
霜飛楚橘來紀事漢廷存太史談經魯國見英才十年獻賦
心同切回首金門罷舉杯

游墅遇陸夢文吳錦雯孫宇台諸公方有淮揚之役

花發離亭日正明隔川飛雨送歸旌人逢驛路江梅落舟下
關河春水生百里鶯聲連茂苑十年柳色暗蕪城淮南賓客

硤川詩鈔

卷四

十一

今誰在漫憶山中叢桂榮

懷感

萬里荒原日色淒羽書稠疊戰塵迷方驚薊北新烽火又聽
淮南舊鼓鼙師出但知函谷隘寇來不覺太行低山川設險
人何似秉鉞空勞降紫泥

禾中懷硤上諸子寄姜楚思

巴山舊雨共論文每苦良辰兩地分春至又生江上草樓高
不見故鄉雲星湖萍散閒垂釣冰市風清獨采芸夢入故園
花酒社座中誰最惜離羣

曉出長山道至白鶴坡

關河曙色隱旌旗路繞長山出隴遲霜壓春橋侵旅跡星回

候館促歸期一聲野鶻愁添處十里荒鷄夢破時前去又聞
沙岸改海城烽火正參差

柳橋弔王元趾

并序

北師入浙檄取越籍父老醪金具牛酒王生大署其
門曰生員王毓著不降時劉念臺先生己七日不食
日進勺水家人竊投補其中得未死生作書上之曰
願先生早自決毋爲王炎午所弔先生遂卻飲而盡
舅氏祁公世培居寓園聞新令至自湛于山池生經
紀其喪明日徐步至柳橋死之賦絕命詞一章藏于
衿次有身亾猶佩信公歌之句

六千君子舊吞吳忍見降旗出上都耶水淒風吹恨滿柳橋

硤川詩鈔

卷四

十三

寒月照孤忠操詞直逼文丞相抱石長隨屈大夫莫道書生
輕殉國三綱繫命在吾徒

秋盡懷拳芳諸子簡李佩士

時鄭澹師姜楚思卽于大初沒

草漸蘭皋松菊存獨添華髮對青樽興亡事盡漁樵路生死
交看鳥雀門客久吳吟方落魄賦成楚些未招魂桂枝偃蹇
芙蓉落長向西風挹淚痕

重歸硤上

昔年親舊幾家存跋履重來獨叩門霜帶續繩應見骨風燈
翦紙未招魂東皋黍地連秋水南國山雞滿夜村腸斷故園
芳草歇不知何路問王孫

寒食感懷

采蘩徑路舊芊綿
苒母叢生滯北年
燕塞熊咻攻蹴踞
漢宮鶯語罷鞦韆
雨摧白社花無賴
煙斷青門柳欲眠
釀就醪醕人寂寞
曲江何處木蘭船

寄懷毘陵王雙白

芙蓉湖水舊時清
欲寄雙魚一愴情
海樹獨分吳地月
江雲遙斷晉陵城
異時花縣停珠勒
何處瓊樓倚鳳笙
猶記過從河朔飲
西陵芳草暮煙平

孤山謁忠烈祠

舊爲四賢祠已併祠甲申殉難諸公

繫馬長楊秋氣悲
夕陽祠廟鎖孤危
離魂猶傍燕山月
墮淚還同峴首碑
雨灑銅駝荆棘蔽
風吹金掌露華衰
孝陵七鬯今誰在
忍對蘋蘩一水湄

硤川詩鈔 卷四

十四

松楸刊盡兩峯高
萬里貞魂氣尚豪
寒雨曉聯慶忌塔
盲風秋捲伍胥濤
祇今瀚海飛精衛
是處空山怨伯勞
猶有遺民從灑涕
中流小艇讀離騷

燕臺從昔築黃金
忽見宮門蔓草侵
其道箭傳青海遠
誰知馬放白登深
平時運甓無陶侃
此日操戈有華歆
一自羣公殉社稷
河山不改舊臣心

易水燕山道路艱
國亡何計得生還
鶴歸華表猶聞唳
龍去冰天不可攀
忍對枌榆新社稷
空憐花柳舊湖山
孤魂尙作春明夢
漢使時時閉玉關

秋興八首

亭皋木葉下紛紛
海上青山幾處烽
斷胡笳催落日月明

羌笛怨秋雲南州冠冕存高士天下英雄起使君梁甫自成
龍臥處朔風陽鳥正離羣

長江樹色隱旌旄潮落煙青幕府高笛步月明收苜蓿酒樓
花滿醉蒲萄金蓮百尺空雕榭鐵鎖千尋有敗塚六代繁華
如旅夢幾人絲竹擅風騷

寒雲邊月滿燕臺繞地黃花雁北來銅馬夢迴青瑣暗觚稜
愁傍紫宸開空懷河朔人千里惟奠長陵土一坏朋舊不堪
同挾策十年江右獨徘徊

角聲吹徹露華晞動地旌旗拂翠微風雨不聞人北渡關山
空見鵲南飛蓬萊方藥無消息閩海樓船有是非極目江湖
行處是故園終擬薜蘿衣

硤川詩鈔 卷四

十五

錢江寒雨蔽艤幢愁倚吳山第一峯萬里兵戈聯蟋蟀百年
花柳沒菱葑行藏梅嶼春游騎晴晦雲屏晚叩鐘最是夢華

愁絕處玉津秋草射堂封

孤山有梅花嶼

越臺高倚暮雲端布鼓雷門王氣殘風雨六陵移劍舄車書
萬國望衣冠當年吳市潛梅福何日東山起謝安猶憶會稽
棲甲日五千君子舊登壇

萬里烽煙正輓芻金風西下滿蒼梧維江曙色迴灤海庾嶺
春雲轉薊都遂有越裳供翡翠無煩厓島盡珊瑚千年佳氣
浮銅柱莫道前旌且渡瀘

輕肥原涉五陵豪憔悴靈均怨楚騷楊柳折殘燕市月芙蓉
馳斷浙江濤千秋堂下罇長在百尺樓頭臥轉高悵望滄洲

淹歲晚雲臺誰實繼蕭曹

蘆湖九日

舊事經心黯未銷漫將行跡混漁樵
靄生蠻島收殘雨風上江門送晚潮
作客江臺誰戲馬懷人明月自吹簫
應知病骨秋能健起折黃花傍酒招

送家孟同陸冰修游燕山

北征有賦同潘岳入洛何心效陸機
燕市酒徒今在否漁陽老將已全非
宮開碣石波濤壯馬渡桑乾苜蓿肥
驃騎盛名應自惜倦游隨見長卿歸

題孝直錢先生永錫錄

卅年慘聽玉門鐘馬角烏頭不易逢
漉血九重愁補牘橐籥

硤川詩鈔

卷四

十六

千里歎尸饔但知塹石飛精衛敢道移根向
螯龍博得春還憐寸草至今江表白雲封

先生侍尊公太守于楚獄幾三十年終以釋褐陳情得雪

送秦壽臣之燕

南國邊聲動征人慘別顏寒風吹易水落日滿燕山

雪夜懷友人都門

聞說燕山地先秋戒早寒不知今夜雪幾倍到征鞍

再訪羸塘橋

垂楊渡口起雛鴉細雨扁舟樂自拏
曾到草堂應記取石橋東去第三家

西宮秋怨

宮槐飛雨墮銀牀雲母屏深翠袖涼
同是漢宮三十六秋聲

應未到昭陽

夜訪友人邨居

秋老蒹葭水一邨故人家在小桃源夜深偶得漁舸出風雨
前溪獨叩門

陸宏定字綸三號紫度又號蓬叟鉦次子處士著靈遠堂

集

宋一是云冰修紫度才品卓卓人咸謂機雲復出其詩直窺漢唐之闢奧○又云紫度移居和什如驚心

啼鳥換耀眼百花明曉寒遲雨信日暖放晴煙琴書閑
白日樽酒對青山花枝宜落日野色嫩晴雲入唐人佳

境矣

紫破文獻錄蓬叟與辛齋伯仲才名並著時稱冰輪二
陸高尚亦同皆稟真如先生懿訓也詩以温季爲宗似
與辛齋各樹一幟而才不
相掩二陸之名洵不誣耳

唐人隴西行

硤川詩鈔 卷四

十七

三年收幽漠二年戍邊城八月軍書急新開萬里營秋風吹
絕塞白日冷沙汀封侯仍宿願但勿隴西行

飲曹秋嶽率園

幽情託泉石市外開園林煙霞護邱壑草木相披紛溪橋環
曲流側路通危岑筍芽破春泥梅實吹清芬不厭客頻過爲
我調山殮

渡楮山

歲暮無所營扁舟駕東越行李僅一肩飄然御風雪海氣忽
朝蒸寒沙凍微裂我馬驅不前招招促奔駛兩山峙如戟雄
濤截蛟穴履險復若夷一葦襄裳涉

上元前一日曉雨

春山靄靄春雲溼垂垂曉雨沉朝日海霧江煙入望愁汀花
渚草傷春色簫鼓千門動地來錦幄銀燈迤邐開昨宵自翦
幽牕燭一鼓朱絲夜色哀

西湖雨渡

奔雲四起青峰失明湖急浪沉西日山腰隱隱度輕雷東風
吹雨巖城黑卑衣短棹客愁何漸吐殘陽渡晚波沖舟一鶴
長天下回首煙霞傍芟荷

嘉禾道中

是真何爲者爾乃亦栖栖身世范難問風塵豈易迷暮雲嘶
野馬殘月叫荒雞不忍他鄉聽行行返釣溪

庚子元日

硤川詩鈔

卷四

六

轉憶愁無賴年來意每慵一經還課子三徑早支筇曉霧含
初旭春雲起臥龍但令風日好遼海自耕農

薔薇

已知春欲盡眞復爲誰榮風細翻紅萼花濃襯晚晴流霞垂
葉淡春露壓枝輕況值將殘日盈盈耀眼明

同童公過淨土菴

河隄隄畔路一徑入精藍短榻朝煙護幽窗雨氣含經聲環
窅堵香爇襲優曇坐久忘歸去虛堂候晚參

時有戒子
促歸方丈

田園春日

棲遲何地問生涯舊業猶存儘自誇二月煙雲縈柳帶一春
晴雨放桃花風流彭澤還陶令潦倒山陽憶向家天上蓬瀛

愁隔絕人間到處有桑麻

門對青山掩靄中煙蘿繚繞動春風朝霞忽散千林翠落日
長開萬井紅自昔忘巢憐社燕於今遵渚有飛鴻五陵年少
如相問野築寒塘一畝宮

麗京移席澗西回蔣禹書張北是

石澗荒蘿一徑通天涯萍聚此山中朝霞展破千巖翠暮雨
樽開萬壑風散髮是誰輕躑躅振衣何地下寵從前山忽霽
餘殘照矯首明湖入望紅

春盡

杏雨榆煙日漸長一春消息竟茫茫樽前自吐青山月鏡裏
愁分綠鬢霜散向芳洲攀杜若親從幽壑種都梁琅玕欲作

硤川詩鈔

卷四

十九

貽人佩縹緲征鴻帝子鄉

中秋夕尋黃晦木不值至斷橋逢查逸遠入稠人坐

初更傳柝出巖城來向明湖探杜蘅皓月也容高士臥青山
偏放旅人醒未聽短拍先腸斷欲倚危欄畏路傾有客獨尋
長夜去會應天柱有吹笙

武塘分韻

生涯無著任西東旅食支離大抵同聚若白雲隨處合散如
黃葉但憑風相尋巢許朱門內也遇宗雷淨社中我欲乘舟
洞庭去前期猶在洞霄宮

簞谷之訂

田園新夏

候轉朱提律漸長田園風景自羲皇新篁綠透疏林嫩短荻

青肥野渚香殘雨一簣編草徑輕炎初服據繩床桃源只在人間世跣足科頭儘不妨

散言春絲和韻息匠南賦

柳岸桃蹊著處妍柔風和日漾絲天妝臺繡繞春心亂歌館飄揚舞袖旋過兩年縈明月下穿花長織畫欄前無端幻作空中色會把韶光一綫牽

露螢伏枕京邸口占楚平悲幽野香英嫩嫩齊頭舊事飛惹事事驅人致路歧求生何意死相隨行如秋雁投歸穴眠似春蠶待吐絲山鬼衣裳憐斃斃雞羣毛翼笑離披燕雲縱便埋雞骨賸有空囊一卷詩

早春雜感

硤川詩鈔卷四

二十

自撫烏皮黠自驚當階萸茱落旋萌梅花雪滲香隨褪柏葉春寒釀未成乍轉玉壺沉夜雨淺燒銀燭入初更茶鐺藥盞空年歲角枕書牀送此生

單衾反側未成眠煨罷寒爐檢一編但聽雨窗催甲夜那知霜鬢已丁年神弦社鼓平明亂促管哀笳徹夜煎舊事新愁都不問辛盤兒女又心前

博山香定篆煙和漫把霜橙手自搓偶倒枯腸搜險句卻傷殘夢引愁魔故書忘盡挑燈憶舊硯封餘檢日磨一覺黃梁還自笑更無消息到南柯

入閩答戒初上人

盤澗編籬斬若新買山來問住山人誰能勘驗當前路且與

經營現在身策杖依雲憑選勝尋花何地不逢春一肩倘甚
吳中月猶及秋江八月蒔

過鹿公

一境江汀聚野沙貽謀負郭自煙霞空疑芳草王孫路但識
南州處士家漲水漫衝孤客棹亂雲深護短屏花同君雙鬢
蕭蕭白與採江蘼感物華

王雙白朱朗誼魏雪竇錢允武蔣馭鴻梁仲木繼至

輕寒二月柳絲柔客到空原盡日留花徑間雲飛乳燕石塘
春雨下羣鷗河流近繞蒼溪下山翠遙分越嶠游芳草青青
歸去路垂鞭看過紫驂騮

仲春雜感

硤川詩鈔 卷四

五

伏枕人間歲月催薜蘿空館自銜杯雕戈紫塞烽猶動錦障
青山夢未回江渚煙霞培野蕙天涯風雨落殘梅春來盡是
牽愁處漫有微吟意轉哀

三徑頻年獨掩扉春泥苔滑過人稀天荒魚雁無消息金盞
交游有是非百尺晴雲繙史閣一竿明月釣魚磯何妨歲序
看炎冷懶性由來與世違

花朝卽事

遲日文牕午睡慵迷離雙眼漫扶筇花枝欲放如人懶春色
將酣似酒濃野築自編荒草徑村春忽起夕陽鐘驚心美景
頻辜負何物能澆塊磊胸

焚香

不定爐沉水，薰香六窗如霧曉。蒼蒼勾他好景來，書幌引我風情入睡鄉。老嬾竟無消算法，陰寒新有破除方。箇中滋味從前淡，一晌留春著甚忙。

暮春晚眺

三月新陰點落紅，沿溪尋勝倚東風。晴梳桃靨欺人面，煖長桑芽促女工。西向柳迎春社燕，南飛雲漏楚天虹。憑高欲攬無邊勝，遠水遙山盡眼中。

送家元歎之楊園

獨縮垂楊送爾行，依依重戀十年情。疏林昨夜三更月，一爲離人分外明。

宿香夢樓

硤川詩鈔 卷四

二五

綺窗長夜撫朱塵，回首春風灑淚辰。三十一年成往事，殘燈疏雨伴愁人。

哭荆璠 并序

嗟乎廿載徂貧，二年沉疾，徧海桑麻，還同裘褐。西山薇蕨，遑問參苓，致致含啼掩泪之年。永地久天，長之恨。恩緣數短，痛與情深。小什以代呼號，亦尋聲破涕之思也。

泉臺何路月朦朧，候冷香銷蕙帳空。入夜哀猿啼不住，霜天衰草斷秋風。

玉鏡鸞銷去不還，天風縹緲白雲間。鮫珠一夜流成血，始信

湘江竹易斑。

但語生前淚不禁
疏燈殘月對寒衾
明知此別終難見
腸斷西風弔影心

熏爐籠霧綺雲低
角枕春濃夜自攜
記得夢回香未散
幽窗斜月滿樓西

並洗鉛華倚玉容
雙雙朝日照芙蓉
霜寒旨酒留餘蓄
風雨何人共御冬

急雨彫殘並蒂蓮
丹楓黃落滿長天
留君身後無窮意
好續他生未盡緣

寓韋園與朱燦文

竹簟藜牀小徑斜
烏皮香几碧窗紗
曲闌干近薔薇架
絕勝城南韋曲花

破川詩鈔卷四

三

10383

寓韋園與朱燦文
竹簟藜牀小徑斜
烏皮香几碧窗紗
曲闌干近薔薇架
絕勝城南韋曲花

謝世未盡緣

急雨凋殘並蒂蓮
丹楓黃落滿長天
留君身後無窮意
好續他生未盡緣

並洗鉛華倚玉容
雙雙朝日照芙蓉
霜寒旨酒留餘蓄
風雨何人共御冬

西風弔影心
但語生前淚不禁
疏燈殘月對寒衾
明知此別終難見
腸斷西風弔影心

破川詩鈔卷四

